


輿地廣記
附札記
四







記 廣 地 輿

記 札 附

(四)

撰 志 陽 歐

輿地廣記卷第二十四

江南東路

次府江寧府。春秋屬吳。戰國屬越。後屬楚。秦屬鄣郡。二漢屬丹陽郡。吳王孫權初鎮丹徒。謂之京城。後徙都秣陵。改爲建業。晉平吳。以爲丹陽郡。及楊州刺史治。東晉元帝渡江。復都焉。改丹陽太守爲尹。宋齊梁陳。因之。常以京口爲重鎮。隋平陳。郡廢。夷蕩耕墾。更於石頭城置蔣州。大業初。復置丹陽郡。唐武德三年。置楊州。七年。平輔公祏。復改爲蔣州。八年。又改爲揚州。九年。州徙治江都。以其地屬潤州。至德二載。析置江寧郡。乾元元年。曰昇州。上元三年。州廢。光啓三年。復置。五代時。南唐李氏竊據。升爲江寧府。皇朝開寶八年。克復。降爲昇州。天禧二年。復升江寧府。建康軍節度。今縣五。

次赤上元縣。本楚邑。楚威王以其地有王氣。埋金以鎮之。故曰金陵。秦改曰秣陵。二漢屬丹陽郡。吳建安十六年。改曰建業。因都焉。晉武帝平吳。復曰秣陵。本治去京邑六十里。故治村是也。安帝義興九年。移治京邑。宋齊梁陳。因之。隋平陳。省秣陵。入江寧縣。置蔣州。唐武德三年。改江寧曰歸化。屬揚州。八年。改歸化曰金陵。九年。改金陵曰白下。屬潤州。正觀九年。復改白下曰江寧。肅宗上元二年。改曰上元。乾元元年。置昇州。南唐置江寧府。故建康縣。本建鄴。晉武帝旣復。改建業爲秣陵。太康三年。又分秣陵之水北。置建鄴縣。後避愍帝名。改曰建康。隋省入江寧。湖熟鎮。本湖熟縣。二漢。晉。宋。屬丹陽郡。後省入焉。有

蔣山石頭城六朝以爲重鎮。

次赤江寧縣。晉武太康元年分秣陵置臨江縣。二年更名。唐既改江寧爲上元。南唐復析上元置江寧。分

治郭下。

次畿句容縣。二漢晉宋屬丹陽郡。隋屬江都郡。唐武德三年置茅州。七年州廢。屬蔣州。九年屬潤州。乾元元年屬昇州。有茅山一名句曲山。形如句字之曲。縣取名焉。

次畿溧水縣。本溧陽縣。二漢晉宋屬丹陽郡。隋改爲溧水縣。屬蔣州。唐武德三年屬楊州。七年屬宣州。乾元元年屬昇州。伍子胥自楚出奔。未至吳而疾。止中道。乞食於溧陽。卽此。

次畿溧陽縣。唐武德三年析溧水縣置。屬楊州。九年屬宣州。上元元年屬昇州。

望宣州。春秋屬吳。戰國屬越。後屬楚。秦屬鄣郡。二漢屬丹陽郡。吳爲重鎮。晉徙丹陽於建鄴。而以其地置宣城郡。宋齊梁陳因之。梁兼置南豫州。隋平陳郡廢。改州爲宣州。大業初復置宣城郡。唐武德三年曰

宣州。天寶元年曰宣城郡。吳升爲寧國軍節度。皇朝因之。今縣六。

望宣城縣。本宛陵縣。二漢爲丹陽郡治。晉置宣城郡。宋齊梁陳因之。隋廢郡。而改宛陵曰宣城。置宣州。唐因之。亦吳懷安縣地。屬丹陽郡。晉屬宣城郡。宋齊梁陳因之。隋省入宣城。有敬亭山。

望南陵縣。漢春穀縣地。屬丹陽郡。東漢晉因之。孝武改爲陽穀。後省。梁置南陵縣及南陵郡。陳置北江州。隋平陳州郡並廢。屬宣城郡。唐武德四年屬池州。州廢。來屬。亦漢宣城縣地。屬丹陽郡。東漢省之。晉復

置屬宣城郡後省故城在今縣東

涇縣二漢屬丹陽郡晉置宣城郡宋齊梁陳因之唐武德三年置南徐州尋更名猷州八年州廢來屬故安吳縣吳分宛陵置晉宋齊梁陳屬宣城郡隋省入涇唐武德三年復置八年又省亦陵陽縣地二漢晉屬丹陽郡成帝以皇后諱改爲廣陽縣宋因之後省有陵陽山列仙傳云陵陽子明釣得白龍放之後三年龍迎子明上陵陽山仙去因以名縣

緊寧國縣吳分宛陵置晉宋齊梁陳皆屬宣城郡隋省入宣城唐武德三年復置屬宣州六年又省天寶三載復置

緊旌德縣唐寶應二年析太平縣置屬宣州有棲真山

中太平縣唐天寶十一載析當塗涇縣置屬宣州大歷中省永泰中復置

上歙州春秋屬吳戰國屬越後屬楚秦屬鄣郡二漢屬丹陽郡吳孫權分置新都郡晉武帝改爲新安郡宋齊因之後廢隋平陳置歙州大業初置新安郡唐武德四年復置歙州天寶元年曰新安郡皇朝因之統縣六

望歙縣二漢屬丹陽郡吳孫權使賀齊平山越於是立始新都尉於歙之華鄉令齊守之遂置始新縣及新都郡晉太康元年改郡曰新安後郡廢而省始新入歙隋平陳廢歙開皇十一年復置屬歙州大業初屬新安郡唐爲歙州治焉

望休寧縣。孫權分歙置休陽縣。晉武帝改爲海寧。屬新安郡。宋因之。隋開皇十八年改爲休寧。大業初置新安郡。唐屬歙州。

望祈門縣。本黟縣地。唐代宗時歙州賊方清據此爲壘。永泰二年平賊。因其壘置祈門縣。屬歙州。有祈山。闔門灘。善覆舟。

望婺源縣。唐開元二十八年析休寧置。屬歙州。

望績溪縣。唐永徽五年分歙置北野縣。屬歙州。後更名績溪。

望黟縣。二漢屬丹陽郡。晉宋屬新安郡。隋平陳縣廢。開皇十一年復置。屬歙州。唐因之。有林歷山。吳賀齊討山越賊保林歷山。四面險絕。齊使以鐵杙琢山而升。出其不意。遂平賊。

上江州。古楊荆二州之境。春秋戰國屬楚。秦屬九江郡。二漢屬廬江。豫章二郡。晉惠帝置尋陽郡。兼置江州。初治豫章。成帝咸康六年移治尋陽。中流襟帶。常爲重鎮。宋齊梁陳因之。隋平陳郡廢。大業初州廢。置九江郡。唐武德四年復置江州。天寶元年曰尋陽郡。皇朝因之。今縣五。

望德化縣。本尋陽縣。二漢屬廬江郡。吳柴桑春郡。晉復屬廬江。永興元年置尋陽郡。咸康六年江州自豫

章徙治尋陽縣。本在江北。溫嶠移置江南。後省入柴桑。柴桑縣。二漢屬豫章郡。曹公攻劉備於夏口。時

孫權擁兵柴桑。以觀成敗。諸葛亮說權。與并力拒曹公。故城在今縣南。所謂楚城鎮是也。宋齊梁陳皆爲尋陽郡。及江州治焉。隋平陳郡廢。復改縣曰尋陽。開皇十八年改曰彭蠡。大業初改曰潁城。置九江

郡。唐復曰尋陽。置江州。五代時改爲德化。禹貢九江在州西北。始別於鄂陵。終會於江口。有廬山、柴桑山、彭蠡湖。

緊德安縣。本歷陵縣地。二漢屬豫章郡。晉屬鄱陽郡。後省。五代時置德安縣。屬江州。有禹貢敷淺原。

中瑞昌縣。五代時置。屬江州。有王喬山、清虛玉華洞。

中湖口縣。五代時置。屬江州。晉盧循之敗。悉力柵左里。宋武帝攻其柵。循單舸走。衆皆降。卽彭蠡湖口。今縣是也。

中彭澤縣。禹貢彭蠡澤在西。因以名縣。二漢、晉屬豫章郡。宋省之。後復置。梁置太康郡。隋平陳。郡縣並廢。而置龍城縣。屬江州。開皇十八年。復改曰彭澤。唐因之。有馬當山。

上池州。春秋屬吳。戰國屬越。後屬楚。秦屬鄣郡。二漢屬丹陽郡。晉屬宣城郡。宋、齊、梁、陳、隋因之。唐武德四年。析宣州置池州。正觀元年。州廢。永泰元年。復置。後曰池陽郡。皇朝因之。今縣六。

望貴池縣。本石城縣地。二漢屬丹陽郡。晉以後屬宣城郡。隋平陳。縣廢。開皇十九年。置秋浦縣。屬宣州。唐分置池州。五代時改秋浦爲貴池。有烏石山、貴池。

上青陽縣。本臨城縣。吳置。晉屬宣城郡。宋、齊、梁、陳因之。隋省入南陵。唐天寶元年。析置青陽縣。屬宣州。後屬池州。有九華山。

上銅陵縣。本南陵縣地。唐析置義安縣。又廢義安爲銅官。五代時置銅陵縣。屬江寧府。皇朝開寶八年。來

屬有梅根山、利國山。

上建德縣。本至德縣。唐至德二年。析鄱陽。秋浦置。屬江州。乾元元年。屬饒州。永泰元年。來屬。五代時。省。後復置。改爲建德。有石門山、闌溪。

上石埭縣。唐永泰中。析青陽。秋浦置。治古石埭城。屬池州。

中下東流縣。五代時置。屬江州。皇朝太平興國三年。來屬。

上饒州。春秋屬楚。後屬吳。戰國屬越。後復屬楚。秦屬九江郡。二漢屬豫章郡。吳孫權分置鄱陽郡。晉、宋、齊、梁、陳、因之。梁兼置吳州。隋平陳。郡廢。改州爲饒州。以其物產豐饒。大業初。復置鄱陽郡。唐武德四年。曰饒州。天寶元年。曰鄱陽郡。皇朝因之。今縣六。

望鄱陽縣。本楚邑。春秋吳伐楚。取鄱。是也。秦時。吳芮爲番陽令。甚得江湖間心。號曰番君。二漢屬豫章郡。吳置鄱陽郡。晉以後因之。隋置饒州。唐因之。有鄱江。故廣晉縣。吳置曰廣昌。卽吳芮故城也。晉太康元年。更名。爲鄱陽郡治。宋因之。後省。唐武德五年。復置。八年。省入鄱陽。

望餘干縣。故越之西境。所謂干越也。二漢曰餘汗。屬豫章郡。晉、宋、齊、梁、陳、隋。屬鄱陽郡。唐屬饒州。有餘水。北流入贛江。

望浮梁縣。本新平縣。唐武德四年。析鄱陽置。屬饒州。八年。省。開元四年。復置新昌。天寶元年。更名浮梁。有石藏山。

望樂平縣。本吳樂安縣。晉宋屬鄱陽郡。後省。唐武德四年。置樂平縣。屬饒州。九年。省。後復置。望德興縣。五代析樂平置。屬饒州。有銀山。

中安仁縣。皇朝開寶八年。以餘干縣地置。安仁場。端拱元年。升爲縣。

上信州。春秋戰國。皆屬越。後屬楚。秦屬九江。會稽二郡。二漢屬豫章。會稽二郡。晉宋及隋。屬鄱陽。東陽二郡。唐乾元元年。析饒州之弋陽。衢州之常山。玉山。及建撫二州之地。置信州。後曰上饒郡。皇朝因之。統縣六。

望上饒縣。吳置。晉省之。宋復置。屬鄱陽郡。後省。唐武德四年。復置。七年。省入弋陽。乾元元年。復置。并置信州。有上饒江。

望玉山縣。唐證聖二年。析常山。須江。弋陽置。屬衢州。乾元元年。來屬。有懷玉山。

望弋陽縣。吳置。葛陽縣。晉宋屬鄱陽郡。隋開皇十二年。改爲弋陽。屬饒州。唐乾元元年。來屬。有弋溪。寶豐鎮。皇朝開寶八年。升爲縣。景祐二年。省。康定元年。復置。慶曆三年。又省。入弋陽。

望貴溪縣。唐永泰元年。析弋陽置。屬信州。有龍虎山。貴溪。

中鉛山縣。五代時置。皇朝開寶八年。以縣直隸京師。後屬信州。有鉛山。

中永豐縣。唐乾元元年。析上饒置。屬信州。元和七年。省入爲鎮。皇朝熙寧七年。復升爲縣。有永豐山。永豐溪。

上太平州。自唐以前地理與宣州同。南唐置雄遠軍。皇朝開寶八年改平南軍。太平興國三年升爲太平州。今縣三。

上當塗縣。本漢丹陽縣地。晉太康二年分置于湖縣。成帝以淮南當塗流民寓居于湖。乃僑立當塗縣以治之。分于湖爲境。而於江南僑立淮南郡。治于湖。以當塗屬焉。宋齊梁陳皆因之。隋平陳郡及于湖廢。以當塗屬丹陽郡。唐武德三年置南豫州。八年州廢。屬宣州。乾元元年屬昇州。上元二年復屬宣州。南唐置雄遠軍。皇朝改爲平南軍。又改爲太平州。于湖縣故城在今縣南。丹陽鎮本丹陽縣。二漢晉宋屬丹陽郡。後廢。唐武德三年析江寧縣復置。屬饒州。九年州廢。屬宣州。正觀元年省入當塗。有牛渚山。一名採石。在縣北大江中。晉溫嶠回軍至牛渚磯。聞鼓樂之音。水深不可測。乃燬犀角照之。見水族奇形異狀。朱衣躍馬。夜見夢嶠曰。與君幽明道別。何得相照。有丹陽湖。慈湖。

中蕪湖縣。本吳鳩茲地。左傳楚子重伐吳。克鳩茲是也。二漢晉屬丹陽郡。晉末僑立襄垣縣。寄治蕪湖。後屬淮南郡。宋齊梁陳因之。隋平陳省襄垣入當塗。五代時析當塗復置蕪湖縣。屬宣州。皇朝太平興國二年來屬。有尺鑄山。蕪湖。

中繁昌縣。晉之繁昌。本屬襄城郡。亂後於此僑立。屬淮南郡。而分于湖爲境。宋齊梁陳因之。隋平陳省繁昌入當塗。五代時析當塗復置。屬宣州。皇朝太平興國二年來屬。有靈山。隱靜山。

同下州南康軍。春秋戰國皆屬楚。秦屬九江郡。漢屬豫章郡。東漢晉宋皆因之。隋屬九江。豫章二郡。唐屬

江洪二州。皇朝太平興國二年。置南康軍。今縣三。

望星子縣。本漢彭澤縣地。屬豫章郡。後爲德化縣之星子鎮。皇朝太平興國三年。置星子縣。屬江州。七年。置南康軍。有廬山、彭蠡湖、落星石。昔有星墜水。化爲石。縣鎮蓋因石爲名。吳越錢氏封爲寶石山。

望建昌縣。本漢海昏縣地。昌邑王賀廢。遷於此。屬豫章郡。東漢永元十六年。置建昌縣。晉、宋、齊、梁、陳、隋。因之。而省海昏入焉。唐武德五年。置南昌州。八年。州廢。屬洪州。皇朝太平興國七年。來屬。亦永脩縣地。東漢中平中。置晉、宋、齊、梁、陳。皆屬豫章郡。隋省入建昌。唐武德五年。復置。八年。省。亦新吳縣地。東漢中平中。置晉、宋、齊、梁、陳。皆屬豫章郡。隋省入建昌。唐武德五年。復置。八年。省。永淳二年。又置。後省。

上都昌縣。本漢彭澤縣地。唐武德五年。置。屬洪州。八年。廢。屬江州。皇朝太平興國七年。來屬。有桑落山。晉將劉毅爲盧循所敗之地。有釣磯山。晉陶侃微時。嘗登此垂釣。

同下州廣德軍。春秋屬吳。戰國屬越。後屬楚。秦屬郢郡。二漢屬丹陽郡。晉屬宣城郡。宋齊因之。梁置大梁郡。又改爲陳留郡。隋平陳。郡廢。屬宣州。唐因之。南唐屬昇州。皇朝開寶八年。屬宣州。太平興國四年。置廣德軍。今縣二。

望廣德縣。本漢丹陽郡地。鴻嘉二年。以爲廣德國。封中山靖王勝之後雲客。是爲夷王。晉太康中。置廣德縣。及宋齊。皆屬宣城郡。梁分置石封縣。并置大梁郡。又改爲陳留郡。隋平陳。郡廢。改石封爲綏安縣。屬宣州。而省廣德入焉。唐武德二載。改綏安爲廣德。南唐屬昇州。皇朝屬宣州。後置廣德軍。有桐源山、桐

水左傳。楚子西子期伐吳。及桐汭。卽此。

望建平縣。本廣德縣之郎步鎮。皇朝端拱元年。置建平縣。屬廣德軍。有伍牙山。伍員伐楚。還吳。經此山。因以爲名。

輿地廣記卷第二十五

江南西路

都督洪州。春秋戰國屬楚。秦屬九江郡。漢高帝改爲淮南國。分置豫章郡。東漢晉因之。東晉置江州。初治此。後徙尋陽。宋齊梁陳皆爲豫章郡。隋平陳郡廢。置洪州。大業初州廢。復置豫章郡。唐武德五年復曰洪州。天寶元年曰豫章郡。後升鎮南軍節度。皇朝因之。今縣八。

望南昌縣。秦爲九江郡南部。漢高帝六年置豫章郡。其城卽灌嬰所築。東漢以後因之。後改南昌曰豫章縣。隋置洪州。唐武德五年析置南昌鍾陵縣。以南昌置孫州。八年州廢。省南昌鍾陵。寶應元年避肅宗諱。改豫章曰鍾陵。正元中又改曰南昌。應劭漢官儀曰。有豫章生於庭中。故以名郡。此木嘗中枯。晉永嘉中。一旦更茂。咸以爲中興之祥。其後元帝果興大業於江南。故郭璞南郊賦云。弊樟擢秀於祖邑。以司馬宣王之祖嘗爲豫章太守故也。有武陽水。

望新建縣。皇朝太平興國六年析南昌縣置。與南昌分治。郭下有西山。章水。

望奉新縣。本新吳縣。漢中平中置。晉以後屬豫章郡。隋平陳省入建昌。晉永淳二年復置。屬洪州。五代時改爲奉新縣。有華林山。大雄山。

望豐城縣。吳分南昌縣地。置富城縣。晉太康元年改曰豐城。屬豫章郡。雷煥得龍淵。太阿於此。宋齊梁陳

皆屬豫章郡。隋平陳省之。開皇十二年復置。曰廣豐。仁壽初改曰豐城。屬洪州。唐因之。

望分寧縣。本艾縣地。左傳吳公子慶忌驟諫吳王弗聽。出居于艾。是也。二漢屬豫章郡。晉宋齊梁陳因之。

隋省入建昌。唐正元十五年析武寧置分寧縣。屬洪州。有旌陽山。昔旌陽令許遜嘗遊此。有脩水。

緊武寧縣。本西安縣地。漢建安中孫權置。晉太康元年改爲豫寧。屬豫章郡。宋齊梁陳皆因之。隋省入建

昌。唐長安四年復置武寧縣。屬洪州。景雲元年改曰豫寧。寶應元年復曰武寧。有幕阜山。

中靖安縣。五代時置。有藥王山。

進賢縣。

上虔州。春秋時百越之地。戰國時吳起相楚悼王。南平百越。於是屬楚。秦屬九江郡。二漢屬豫章郡。吳屬

廬陵郡。晉太康三年置南康郡。宋爲南康國。齊梁陳復爲南康郡。隋平陳郡廢。置虔州。大業初州廢。置南

康郡。唐武德五年曰虔州。天寶元年曰南康郡。後唐長興二年升爲昭信軍節度。皇朝因之。今縣十

望贛縣。二漢屬豫章郡。吳爲廬陵南部都尉治。唐置南康郡。宋齊梁陳皆因之。隋置虔州。改贛縣爲南康。

大業初復改爲贛。唐因之。有贛水。東源出雩都。曰湖漢水。西源出南野。曰彭水。二水皆北流。合于贛縣。

摠爲豫章水。北流入大江。後人因贛字。以湖漢水爲貢水。彭水爲章水。而劉澄之遂以爲章貢合流。因

以名縣。蓋失之矣。平固鎮。本平固縣。吳曰平陽。晉太康元年更名。屬南康郡。宋因之。後省爲鎮。

望虔化縣。漢贛縣地。吳置陽都縣。晉太康元年改曰寧都。後省焉。宋復置。大明五年以虔化屯別置虔化

縣。並屬南康郡。後省虔化入寧都。隋平陳。改寧都曰虔化。屬虔州。唐因之。上有梅嶺山。漢時。閩越反。武帝令諸校屯豫章梅嶺。待命。閩越發兵入梅嶺。殺漢校尉。卽此縣地。有石鼓山。

望興國縣。本贛縣地。皇朝太平興國八年。以險江鎮置興國縣。有覆筍山。

望信豐縣。本南康地。唐永淳元年。分置南安縣。屬虔州。天寶元年。改爲信豐。

望零都縣。二漢屬豫章郡。晉宋屬南康郡。後省。隋平陳。復置。屬虔州。唐因之。有金鷄山。云時見金鷄出於

石上。有盤固山。

望會昌縣。本零都縣地。皇朝太平興國八年。以九州鎮置。有君山。

望瑞金縣。本零都縣地。有金。唐天祐元年。置瑞金監。後升爲縣。屬虔州。有銅鉢山、綿江。

緊石城縣。五代時置。屬虔州。

上安遠縣。唐正元四年。析零都縣置。屬虔州。

中龍南縣。本漢南野縣地。五代時置。屬虔州。有聶都山。山海經曰。贛水出聶都山。卽此。

上吉州。春秋時百越之地。戰國屬楚。秦屬九江郡。二漢屬豫章郡。興平元年。孫策分置廬陵郡。吳寶鼎二

年。孫皓又置安城郡。晉宋齊梁陳皆因之。隋平陳。二郡俱廢。置吉州。大業初。復置廬陵郡。唐武德五年。曰

吉州。天寶元年。曰廬陵郡。皇朝因之。今縣八。

望廬陵縣。二漢屬豫章郡。孫策改爲石陽縣。分置廬陵郡。晉宋因之。後復改石陽爲廬陵縣。隋置吉州。唐

因之有玉筍山。

望吉水縣。本吉陽縣地。吳置。晉宋屬廬陵郡。後省焉。皇朝太平興國九年。置吉水縣。有仁山。吉水。

望安福縣。本漢安成縣。屬長沙國。東漢屬長沙郡。吳屬安成郡。晉改縣曰安復。宋齊梁陳皆因之。隋平陳。郡廢。改安復縣爲安成。十八年。又曰安復。屬吉州。唐武德五年。改縣曰安福。置潁州。七年。廢。來屬。有廬

永。東至廬陵。入贛江。

望太和縣。吳置。西昌、東昌二縣。晉宋皆屬廬陵郡。後西昌省。東昌入焉。改爲太和縣。屬吉州。唐因之。有贛石山。遂興水。

望龍泉縣。五代時置。屬吉州。有石含山。

望永新縣。吳置。屬安成郡。晉宋因之。後省。唐武德五年。復置。屬南平州。八年。州廢。省入太和。顯慶二年。復置。來屬。有永新山。勝業水。

望永豐縣。本吉水縣地。皇朝至和元年。以報恩鎮置。永豐縣。有雲蓋山。報恩江。

望萬安縣。本龍泉縣地。皇朝熙寧四年。以萬安鎮置。有龍頭山。雲洲。

上袁州。春秋爲百越之地。戰國屬楚。秦屬九江郡。二漢屬豫章郡。吳屬安城郡。晉宋齊梁陳因之。隋平陳。郡廢。置袁州。大業初。州廢。置宜春郡。唐武德四年。曰袁州。天寶元年。曰宜春郡。皇朝因之。今縣四。

望宜春縣。二漢屬豫章郡。吳屬安城郡。晉孝武改爲宜陽。宋以後因之。隋復改爲宜春。屬宜春郡。唐因之。

有仰山、袁江、有宜春泉、醞酒入貢。

望分宜縣。本宜春縣地。皇朝雍正元年置。有鍾山。郡國志云。晉永嘉元年。因水有大鍾。從山上墜水中。驗其銘。是秦時樂器。故以名山。有昌山。

望萍鄉縣。吳置。屬安城郡。晉以後因之。隋屬宜春郡。唐因之。有羅霄山、揚岐水。

緊萬歲縣。本陽樂縣地。吳黃武中置。晉太康元年。改爲康樂。屬豫章郡。宋因之。謝靈運襲封康樂公。卽此。

後省焉。唐武德五年。復置陽樂縣。屬靖州。八年。州廢。省入高安。五代時。以其地置萬歲縣。屬洪州。後屬筠州。皇朝開寶八年。來屬。有康樂故城。有謝山、康樂水。

上撫州。春秋時百越之地。戰國屬楚。秦屬九江郡。二漢屬豫章郡。吳太平二年。分置臨川郡。晉以後因之。隋平陳。郡廢。置撫州。大業初。州廢。置臨川郡。唐武德五年。曰撫州。天寶元年。曰臨川郡。皇朝因之。今縣四。望臨川縣。本南昌縣地。東漢永元八年。置臨汝縣。屬豫章郡。吳孫亮分置臨川郡。晉以後因之。隋置撫州。改臨汝縣爲臨川。唐因之。有義峯山。本曰銅山。唐天寶中。改名。有臨川水。

望崇仁縣。本吳置巴丘縣。屬廬陵郡。置新建縣。屬臨川郡。晉宋因之。梁改巴丘爲巴山。及置巴山郡。隋平陳。郡縣俱廢。置崇仁縣。屬撫州。唐因之。有崇仁山、寶唐水。

望宜黃縣。唐武德五年。析崇仁置。屬撫州。八年。省。皇朝開寶八年。以宜黃場復置。有宜黃水。

望金谿縣。本臨川縣地。皇朝開寶五年。以金谿場置。有靈秀山、金谿水。

上筠州。自唐以前。地理與洪州同。南唐李景置筠州。皇朝因之。今縣三。

望高安縣。本建城縣。二漢屬豫章郡。晉以後因之。縣出然石。石色黃白而疎理。以水灌之則熱。著鼎其上。足以熟物。元康中。雷煥入洛。賈石以示張華。華曰。此謂然石。於是始識其名。隋屬洪州。唐武德五年。改建城曰高安。置靖州。七年。改爲米州。又改爲筠州。八年。州廢。屬洪州。南唐復置筠州。有飛山。鍾口江。

望上高縣。五代時置。屬洪州。南唐來屬。有八疊山。斜口水。

望新昌縣。皇朝太平興國三年。以高安監步鎮置。有黃蘗山。

同下州興國軍。自五代以前。地理與鄂州同。皇朝太平興國二年。置興國軍。今縣三。

望永興縣。本鄂縣地。二漢屬江夏郡。吳孫權改鄂爲武昌。而別置陽新縣。屬武昌郡。晉以後因之。江左又析置永興縣。隋平陳。改陽新曰富川。開元十一年。省永興入焉。十八年。改富川縣曰永興。屬鄂州。唐因之。皇朝置興國軍。有闔閭山。吳王闔閭與楚相持。屯此。

緊大冶縣。皇朝乾德五年。以大冶場置。屬鄂州。太平興國二年。來屬。有磁湖。

中通山縣。五代時置。屬鄂州。皇朝太平興國二年。來屬。有翠屏山。本名石城。唐天寶中。改名。

同下州南安軍。自五代以前。地理與虔州同。皇朝淳化元年。置今縣三。

中大庾縣。唐神龍元年。析南康縣置。屬虔州。皇朝置南安軍。有大庾嶺。五嶺之最東者。亦曰東嶠。有橫浦關。漢討南越。楊僕爲樓舡將軍。出豫章。下橫浦。是也。有涼熱水。水經注云。連溪出南康縣涼熱山。卽此。

水也。

望南康縣。本漢南野縣地。吳分置南安縣。晉太康元年。改曰南康。屬南康郡。宋因之。改曰贛縣。隋大業初。復曰南康。屬南康郡。唐屬河州。皇朝淳化元年。來屬南野鎮。本南野縣。二漢屬豫章郡。晉屬廬陵郡。宋屬南康郡。後省爲鎮。有君山。章水。

上上猶縣。五代時置。屬虔州。皇朝淳化元年。來屬。有猶水。

同下州臨江軍。自五代以前。地理與筠袁吉三州同。皇朝淳化三年。置。今縣三。

望清口縣。五代時置。屬洪州。南唐屬筠州。皇朝置臨江軍。

望新淦縣。二漢屬豫章郡。晉宋因之。隋屬廬陵郡。唐屬吉州。皇朝淳化三年。來屬。有玉笥山。淦水。

望新喻縣。吳分宜春置。晉宋屬安成郡。隋屬宜春郡。唐屬袁州。皇朝淳化三年。來屬。本曰新淦。唐天寶後。相承作喻。有淦水。

同下州建昌軍。自唐以前。地理與撫州同。南唐析置建武軍。皇朝太平興國四年。改名。今縣二。

望南城縣。二漢屬豫章郡。晉以後。屬臨川郡。隋唐屬撫州。南唐置軍。有麻姑山。

望南豐縣。吳置。屬臨川郡。晉宋因之。後省。唐景雲二年。析南城置。屬撫州。皇朝淳化二年。來屬。有軍山。

輿地廣記卷第二十六

荆湖南路

上潭州古三苗國之地。春秋戰國屬楚。秦置長沙郡。漢爲國。東漢復爲郡。晉屬長沙及衡陽郡。永嘉元年。兼置湘州。宋齊梁陳因之。隋平陳郡廢。置潭州。以昭潭爲名。大業初州廢。置長沙郡。唐武德四年曰潭州。天寶元年曰長沙郡。升爲武安軍節度。皇朝因之。今縣十一。

望長沙縣。故青陽地。秦始皇二十六年。荆王獻青陽以西是也。漢爲臨湘縣。高帝五年。以封吳芮爲長沙王。都此。其城卽芮所築。東漢及晉爲郡。宋爲國。齊梁陳爲郡。隋爲潭州。唐因之。唐末馬氏父子竊據其地。後爲南唐所取。有嶽麓山。昭山。山下有旋泉。深不可測。人以爲昭潭無底。有湘水。瀉水。有賈誼宅。井仍存。

望衡山縣。本湘南縣地。吳析置衡陽縣。及置衡陽郡。晉惠帝改縣曰衡山。宋齊梁陳因之。隋平陳郡廢。屬潭州。唐神龍三年屬衡州。皇朝淳化四年來屬。禹貢衡山在西南。有三峯。曰祝融。紫蓋。石廩。韓愈詩。紫蓋連延接天柱。石廩騰擲堆祝融。有湘水。

望安化縣。本益陽縣地。皇朝熙寧六年置。有浮青山。資水。
望醴陵縣。本漢臨湘縣地。高后封長沙相。越爲醴陵侯。卽此。東漢置醴陵縣。屬長沙郡。建安八年。縣有大

山常鳴如牛响聲積數年後豫章賊攻沒縣亭晉宋皆屬長沙郡後省唐武德四年復置屬潭州有王喬山醴泉

上攸縣漢屬長沙國東漢晉宋屬長沙郡後改爲攸水隋平陳省入湘潭縣後復置唐武德四年置南雲州正觀元年州廢屬衡州五代時來屬有雲陽山攸水

中湘鄉縣本湘南縣之湘鄉東漢置縣屬零陵郡晉宋屬衡陽郡後省唐武德四年析衡山置屬潭州有漣水歷石魚山下石色黑而理若雲母開發一重輒有魚形長數寸鱗鱗首尾若刻畫燒之作魚膏腥

中湘潭縣本湘南縣地禹貢衡山在東南湘中記曰衡山有玉牒禹案其文以治水遙望衡山如陣雲沿湘千里九向九背迺不復見漢屬長沙國東漢屬長沙郡晉宋屬衡陽郡後省而置湘潭縣隋屬衡州

唐元和後來屬有湘水涓湖

中益陽縣漢屬長沙國東漢晉宋齊梁陳屬長沙郡隋唐屬潭州有浮丘山益水水經注以益水爲資水之殊目縣南十里有平崗岡有井數百淺者四五尺深者不測俗云昔有金人以杖撞地輒便成井

中瀏陽縣本漢臨湘地吳置瀏陽縣屬長沙郡晉宋因之後省唐景龍二年析長沙復置屬潭州有瀏水中湘陰縣本羅縣地宋元徽二年分置湘陰縣屬湘東郡齊因之梁置羅州及岳陽郡陳廢州隋平陳郡

廢省湘陰入岳陽縣置玉州尋改岳陽爲湘陰縣開皇十一年州廢屬岳州唐因之皇朝淳化四年來屬故羅縣羅國本在襄州宜城之西楚文王徙羅子居此秦爲羅縣屬長沙郡二漢晉宋齊因之梁陳

屬岳陽郡。隋平陳，屬岳州。唐武德八年，省入湘陰。故城在今縣東北。有湘山、湘水、汨水，出艾縣桓山。西逕羅縣北。又西逕吳昌縣北。東漢置曰漢昌。吳更名。隋省入羅。又西逕玉笥山。又西爲屈潭。楚屈原被讒放逐，懷沙自沉於此。又逕汨羅戍南。又西入于湘。春秋所謂羅汭也。有黃陵水，上承大湖，西流入湘。逕二妃廟南。世謂之黃陵廟。秦始皇遊至湘山，逢大風，問博士曰：「湘君何神？」博士對曰：「堯女舜妻，而葬此。始皇大怒，使刑徒三千人伐湖山木，赭其山焉。」

中寧鄉縣。吳新陽縣地。晉太康元年，改爲新康。屬衡陽郡。宋以後因之。隋平陳，省入益陽縣。唐武德四年，復置。七年，又省。皇朝太平興國二年，析長沙置有大瀉山、青陽山、瀉水。

上衡州。春秋戰國屬楚。秦屬長沙郡。二漢屬長沙、桂陽二郡。吳置湘東、衡陽二郡。晉、宋、齊、梁、陳皆因之。隋平陳省二郡。置衡陽。大業初，州廢。置衡山郡。唐武德四年，曰衡州。天寶元年，曰衡陽郡。皇朝因之。今縣五望。衡陽縣。本鄆縣地。漢屬長沙國。東漢屬長沙郡。吳置湘東郡及臨烝縣。東南去鄆縣十五里。晉因之。太元二十年，省鄆入焉。宋、齊、梁、陳因之。隋平陳，置衡州。改臨烝爲衡陽縣。唐因之。亦漢鍾武縣地。屬零陵郡。東漢改爲重安。晉宋以後，屬衡陽郡。隋省入衡陽縣。後復置。唐武德七年，又省入。有岫嶼山，卽南岳之別名。有湘水、烝水，有合江亭。韓愈詩：「江亭枕湘江，烝水會其左。有鄆湖，周回三里，取水爲酒，極醇美。」晉武帝平吳，始薦鄆酒於太廟。

中茶陵縣。漢屬長沙國。東漢屬長沙郡。晉屬湘東郡。宋、齊、梁、陳因之。隋省入湘潭縣。唐武德四年，析攸縣

復置屬南雲州。正觀元年。又省。聖曆元年。復置。來屬。有雲陽山。茶水。漢地理志。茶陵有泥水。西入湘。水。經謂之沫水。卽今茶水是也。茶。弋奢反。

中耒陽縣。二漢屬桂陽郡。晉宋以後因之。隋平陳。改曰涿陰。屬衡州。唐武德四年。復曰耒陽。有侯曇山。涑水出郴縣西北。過涿陽。又北至衡陽。入湘。

中下常寧縣。吳分涿陽置新寧縣。晉屬湘東郡。宋齊梁陳皆因之。隋屬衡州。唐天寶元年。改曰常寧。有道遙山。湘水宜水。

下安仁縣。皇朝乾德三年。以安仁場置。後析衡陽、衡山二縣地入焉。

中道州。春秋戰國屬楚。秦屬長沙郡。漢分屬零陵郡。東漢晉因之。穆帝分置營陽郡。宋齊因之。梁改爲永陽郡。隋平陳郡廢。屬永州。大業初。州廢。屬零陵郡。唐武德四年。平蕭銑。置營州。五年。改爲南營州。正觀八年。改爲道州。天寶元年。曰江華郡。皇朝因之。今縣四。

緊營道縣。本漢營浦縣。屬零陵郡。晉置營陽郡。宋齊因之。而析置營陽縣爲郡治。梁改郡縣皆曰永陽。隋開皇中。郡廢。省營浦入永陽。屬永州。唐武德四年。置營州。改永陽爲營道縣。正觀八年。改營州爲道州。天寶元年。改營道爲弘道縣。皇朝建隆三年。復曰營道。有營道山。營水出冷道縣。西流。逕九疑山下。又西逕營道。又屈而東北。逕營浦。又北流。注于湘。亦虞時鼻國之地。有象祠。唐元和中。刺史薛伯高毀之。柳宗元作斥鼻亭神記。

緊永明縣。本漢營浦縣地。唐既徙置營道於永陽。乃徙置永陽於此。屬道州。正觀八年。省。天授二年。復置。天寶元年。更名皇朝熙寧五年。省爲鎮。入營道。元祐二年。復置。

緊江華縣。漢馮乘縣地。屬蒼梧郡。唐武德四年。析置江華縣。屬道州。正觀十七年。屬永州。上元二年。復來屬。文明元年。改曰雲漢。神龍元年。復故。有吳望山。沱水。

緊寧遠縣。漢冷道。營道。二縣地。並屬零陵郡。東漢及晉皆因之。東晉屬營陽郡。宋齊因之。梁陳屬永陽郡。隋省冷道入營道。而徙營道於冷道廢城。屬永州。唐武德四年。徙置營道於永陽縣。乃於此地置唐興縣。屬營州。正觀八年。屬道州。長壽二年。改曰武盛。神龍元年。復曰唐興。天寶元年。改曰延唐。朱梁改曰延昌。後唐復故。晉天福初。曰延喜。皇朝乾德三年。改爲寧遠。有九疑山。虞舜所葬。其山九谿相似。故名。有冷水。出此山北流。逕冷道西南。又北流。入都溪水。故大曆縣。本漢冷道之舂陵鄉。長沙定王封其子。置是。爲舂陵節侯。後省。吳復置。屬零陵郡。東晉屬營陽郡。宋齊因之。梁陳屬永陽郡。隋平陳。省入營道。唐大曆二年。析延唐縣。置於舂陵故城北十五里。名曰大曆。屬道州。皇朝乾德三年。省入寧遠。有舂溪水。卽所謂都溪也。西北流。入于營水。

中永州。春秋。戰國。屬楚。秦屬長沙郡。漢元鼎六年。置零陵郡。東漢。吳。晉。宋。齊。梁。陳。因之。隋開皇初。郡廢。置永州。大業初。州廢。復置零陵郡。唐武德四年。平蕭銑。置永州。天寶元年。曰零陵郡。皇朝因之。今縣三。望零陵縣。本漢泉陵縣。屬零陵郡。東漢爲郡治。晉。宋。齊。梁。陳。因之。隋置永州。改泉陵爲零陵縣。唐因之。泉

陵故城在今縣北二里。亦晉應陽縣地。惠帝分觀陽置。屬零陵郡。宋、齊、梁、陳因之。隋省入零陵縣。應水東南流入湘。有臯墟。象之所封也。有萬石山。瀟湘水。縣有香茅。自古貢之。禹貢荊州菁茅也。

中祁陽縣。吳分泉陵置。屬零陵郡。晉、宋、齊、梁、陳因之。隋省入零陵縣。唐武德四年復置。屬永州。亦吳永昌縣地。晉、宋、齊、梁、陳屬零陵郡。隋省入零陵縣。後分入祁陽。有石鷲山。石色紺而狀似鷲。或大或小。若母子。及雷風相薄。則羣飛頡頏。有湘水。

中東安縣。皇朝雍熙元年。以零陵縣之東安場置。

中郴州。春秋戰國屬楚。秦屬長沙郡。項羽尊楚懷王爲義帝。都郴。漢高帝二年。置桂陽郡。東漢、晉、宋、齊、梁、陳因之。隋開皇中。平陳郡廢。置郴州。大業初。州廢。復置桂陽郡。唐武德四年。平蕭銑。置郴州。天寶元年。曰桂陽郡。皇朝因之。今縣四。

緊郴縣。義帝所都。項羽使英布害之。縣南有義帝冢。漢屬桂陽郡。東漢以後因之。隋置郴州。唐因之。有靈壽山。古所謂萬歲山也。有石室。室有鍾乳。上悉生靈壽木。下有千秋溪。又有淥水。出縣東侯公山。西北流而南屈。注于耒。謂之程鄉溪。昔置酒官醞於山下。名曰程酒。獻同鄴酒焉。

中桂陽縣。漢郴縣地。東晉分置汝城縣。屬桂陽郡。宋、齊、梁因之。陳改爲盧陽縣。及置盧陽郡。隋平陳。郡廢。以縣屬郴州。唐天寶元年。改爲義昌。後唐改曰郴義。皇朝太平興國元年。改爲桂陽。有耒山。耒水所出。西北流。逕汝城縣北。又西北逕晉寧縣北。又北過郴縣西。又北過便縣西。又西北過耒陽縣東。又北過

鄱縣東又西北至臨丞而右注湘水。

中宜章縣。隋大業末。蕭銑析郴置義章縣。屬郴州。唐因之。皇朝太平興國元年。改曰宜章。亦二漢臨武縣地。屬桂陽郡。晉、宋、齊、梁、陳因之。隋唐屬郴州。後廢。有武溪。南入樂昌。有嵐嶺。

中永興縣。漢便縣。屬桂陽郡。東漢、吳、晉因之。宋省焉。唐開元十三年。置安陵縣。屬郴州。天寶元年。改爲高亭。皇朝熙寧六年。改爲永興。有高亭山、安陵山。

中邵州。春秋、戰國屬楚。秦屬長沙郡。二漢屬長沙、零陵二郡。吳寶鼎元年。分置邵陵郡。晉、宋、齊、梁、陳因之。隋平陳郡廢。屬湘州。唐武德四年。平蕭銑。置南梁州。正觀十年。改爲邵州。天寶元年。曰邵陽郡。皇朝因之。今縣三。

望邵陽縣。漢曰昭陵。屬長沙郡。吳置邵陵郡。晉改縣曰邵陵。宋因之。後省入邵陽。邵陽本昭陽。東漢置。屬零陵郡。晉武帝改焉。屬邵陵郡。宋因之。後併邵陵入。而以邵陽爲郡治。隋郡廢。屬湘州。唐武德四年。復置邵陵縣。七年。省入邵陽。後置邵州。又吳置高平縣。屬邵陵郡。晉宋因之。後省入邵陽。有文斤水。邵陵水。

望新化縣。皇朝收復梅山。以其地置新化縣。屬邵州。有長龍山、濱水。

下蒔竹縣。皇朝元豐四年。以洞溪徽州置蒔竹縣。屬邵州。有九龍山、蒔竹水。

下全州。自後唐以前。地理與永州同。石晉天福三年。楚王馬希範奏置全州。皇朝因之。今縣二。

望清湘縣。漢零陵、洮陽二縣地。並屬零陵郡。東漢、晉、宋、齊、梁、陳皆因之。隋省而置湘源縣。屬永州。唐因之。後改爲湘川。楚又改爲清湘。而置全州。有湘山、宜湘水。漢洮陽故城在今縣西北。零陵故城在南。

中灌陽縣。漢零陵縣地。吳分置觀陽。屬零陵郡。晉、宋、梁、齊、陳皆因之。隋省入湘源縣。大業末。蕭銑復置。屬永州。唐武德七年省。上元二年復置。石晉時來屬。有灌水。

同下州武國軍。自五代以前。地理與邵州同。皇朝因之。

中武岡縣。二漢都梁縣地。屬零陵郡。晉武帝分置武岡縣。屬邵陵郡。宋因之。後省入都梁縣。隋又省都梁入邵陽縣。後復置。曰武攸。唐武德四年改爲武岡。屬南梁州。後屬邵州。皇朝置武岡軍。縣左右二岡對峙。重岨齊秀。間可二里。舊傳東漢伐五溪蠻。蠻保此崗。故曰武岡。亦二漢夫夷縣地。屬零陵郡。吳屬邵陵郡。晉、宋、齊、梁、陳皆因之。隋省入邵陽。唐分屬武岡。故城在縣東北。晉武帝置建興縣。屬邵陽郡。晉、宋因之。後省焉。唐武德四年復置。七年省入武岡。有唐糾山。潑水所出。

同下州桂陽監。自五代以前。地理與郴州同。後置桂陽監。皇朝因之。今縣二。

上平陽縣。按舊唐史志云。晉分郴置平陽縣。陳廢。蕭銑復置。唐武德七年省。八年復置。屬郴州。然晉、宋二志皆無此縣。五代時廢焉。皇朝天禧元年復置桂陽監。治此。有大湊山、靈星江。

中藍山縣。本二漢南平縣。屬桂陽郡。晉、宋因之。後省。唐咸亨二年復置。屬郴州。天寶元年改爲藍山。皇朝景德元年來屬。有藍山。

輿地廣記卷第二十七

荆湖北路上

次府江陵府。春秋已來爲楚都。秦昭襄王二十九年置南郡。漢高帝元年改爲臨江郡。五年復故。景帝二年爲臨江國。中二年復故。東漢、晉、宋、齊、梁、陳因之。梁元帝都焉。爲西魏所滅。以封後梁爲蕃國。隋開皇七年併。後梁置江陵摠管府。二十年改爲荊州。大業初復置南郡。唐武德四年平蕭銑。置荊州。天寶元年曰江陵郡。後升荊南節度。上元元年置南都及江陵府。尋罷都。五代爲南平王高氏所據。皇朝復之。今縣八。次赤江陵縣。故楚郢都之地。戰國時秦使白起拔郢。分郢置江陵縣。及置南郡。而楚徙都陳。項羽封楚柱國。共敖爲臨江王。漢得之。以爲郡。景帝復封子榮爲臨江王。國除。復爲南郡。東漢省郢入江陵。建安中劉備有之。後入於吳。晉□□州治此。東晉爲重鎮。宋齊因之。梁元帝以爲都。西魏使于謹平江陵。以封後梁蕭詧。隋置荊州。大業末爲蕭銑所據。唐置江陵郡。江陵府縣北十里有紀南城。楚文王自丹陽徙此。後遷於郢。平王時子囊城之。故城在縣東南。有渚宮。今郡城晉桓溫所築。有龍山、漢江。次畿公安縣。本二漢孱陵縣地。建安中左將軍劉備爲荊州牧。自襄陽來鎮油口。使築而居之。時號左公。因名其地曰公安。晉杜預平江南。置江安縣。屬南平郡。宋爲郡治。後改爲公安。陳置荊州。隋屬江陵摠管府。唐因之。孱陵鎮。故孱陵縣。二漢屬武陵郡。晉、宋、齊、梁、陳屬南平郡。隋省入公安。有謝山、油水。

次畿潛江縣。漢江陵縣地。皇朝乾德三年置。有漢江。

次畿監利縣。本漢華容縣地。吳置監利縣。尋省。晉太康四年復置。屬南郡。宋孝建元年屬巴陵郡。隋屬沔陽郡。唐屬復州。朱梁開平三年來屬。有五花山。

次畿松滋縣。本漢高城縣地。屬南郡。東漢省。而漢松滋縣屬廬江郡。晉屬安豐郡。晉以松滋流民避亂至此。乃僑置縣以治之。屬南郡。宋屬南河東郡。齊、梁、陳皆因之。隋開皇中郡廢。屬荊州。唐因之。縣西有上明廢城。東晉荊州刺史桓冲以符秦彊盛。自襄陽退屯於此。其城卽冲所築。

次畿枝江縣。故羅國。楚自宜城西山徙之於此。後又徙之湘陰。二漢爲枝江縣。屬南郡。晉、宋、齊、梁、陳因之。隋屬荊州。唐屬江陵府。上元元年省入長寧縣。大曆六年復置。省長寧入焉。皇朝熙寧六年省入松滋縣。後復置。縣西有津鄉。春秋巴人伐楚。楚子禦之大敗於津鄉。此其地也。

次畿石首縣。本二漢華容縣。屬南郡。晉、宋因之。後省。唐武德四年置石首縣。屬荊州。以石首山爲名。次畿建寧縣。皇朝乾德三年置。熙寧六年省入石首。元祐元年復置。

緊鄂州。春秋以來屬楚。秦屬南郡。漢屬江夏郡。東漢因之。吳分置武昌郡。晉、宋屬江夏、武昌二郡。兼置鄂州。齊因之。梁分置北新州及上雋郡。隋平陳三郡俱廢。改置鄂州。大業初復置江夏郡。唐武德四年平蕭銑。復爲鄂州。天寶元年復爲江夏郡。後升武昌軍節度。皇朝因之。今縣七。

緊江夏縣。本二漢沙羨縣地。屬江夏郡。建安中荊州牧劉表使黃祖守沙羨。爲孫權所破。吳省之。晉太康

元年復置。後屬武昌郡。東晉僑置汝南郡。此爲汝南縣。隋平陳置鄂州。改縣曰江夏。唐因之。按水經。夏水。自賂口下。沔水通兼夏口而南。至魯山下。會于江。在今縣西。故得江夏之名。春秋時謂之夏汭。後世謂之夏口。亦謂之魯口。歷代常爲重鎮。梁武帝自襄陽起兵。進逼郢城。有數百毛人。踰堞且泣。因投黃鵠磯。蓋城之精也。明旦城降。有黃鶴山。鸚鵡洲。

望崇陽縣。唐天寶二年開山洞。置唐年縣。屬鄂州。朱梁改爲臨夏。後唐復故名。石晉天福初改爲臨江。皇朝開寶八年改爲崇陽。

上武昌縣。故楚之東鄂也。楚子熊渠封中子紅爲鄂王。二漢鄂縣屬江夏郡。吳孫權都之。黃初三年改爲武昌縣。及置江夏郡。黃龍元年遷都建業。以陸遜輔太子。鎮武昌。孫皓亦嘗都此。及東還使滕牧守之。晉太康元年改江夏郡曰武昌郡。永平中始置江州。傅綜爲刺史。治此。東晉時庾亮謝尚亦鎮焉。宋齊梁陳皆爲武昌郡。隋屬鄂州。唐因之。故西陵縣。二漢屬江夏郡。魏屬弋陽郡。晉惠帝分屬西陽國。宋因之。陳省入武昌。有樊山。嶢嶸洲。晉劉毅破桓玄於此。

中蒲圻縣。晉太康元年置。屬長沙郡。宋元嘉十六年屬巴陵郡。孝建元年屬江夏郡。梁置上雋郡。隋平陳郡廢。屬鄂州。唐因之。有赤壁山。漢末孫權遣周瑜與劉備併力敗曹公于此。有蒲圻湖。中咸寧縣。五代時置永安縣。屬鄂州。皇朝景德四年改今名。有鍾臺山。牛臯潭。

中通城縣。本崇陽縣地。皇朝熙寧五年。升通城鎮爲縣。有九嶺山、鷄鳴山、太平港。

下嘉魚縣。晉沙陽縣地。屬武昌郡。宋元嘉十六年。屬巴陽郡。孝建元年。屬江夏郡。梁置沙州。尋廢。隋省沙陽入蒲圻。五代時。置嘉魚縣。屬鄂州。有魚嶽山。在大江中。

中安州。春秋戰國屬楚。秦屬南郡。漢高帝置江夏郡。東漢晉因之。宋孝建元年。分置安陸郡。齊因之。梁置南司州。尋罷。西魏置安州。摠管府。隋開皇初。郡廢。十四年。府廢。大業初。復置安陸郡。唐武德四年。平王世充。改爲安州。天寶元年。復曰安陸郡。後唐升安遠軍節度。皇朝因之。今縣五。

中安陸縣。漢屬江夏郡。晉爲郡治。宋置安陸郡。梁置南司州。西魏置安州。隋唐因之。漢江夏郡故城在東南。有禹貢陪尾山、石巖山。晉張昌作亂山下。鎮南將軍劉弘擊斬之。有沮水。東南入沔。有雲夢澤。然楚之雲夢跨江南北。非止此而已。

中雲夢縣。西魏置。隋屬安州。唐因之。皇朝熙寧二年。省入安陸。元祐元年。復置。按漢地理志。西陵縣爲江夏郡治。而有雲夢官。疑此地是也。

中應城縣。漢雲杜縣地。西魏置。隋大業初。改曰應陽。屬安陸郡。唐武德四年。復曰應城。屬安州。元和三年。省入雲夢。大和二年。復置。天祐二年。改曰應陽。後唐復故。有決河水。出大洪山。東流入于沮。有溫泉水。出京山東澤中。淵靜如鑑。聞人聲則湯湯奮發。其熱可以燂鷄。東南流。注于沮。有蒲騷城。左傳。郟人軍於蒲騷。是也。

中孝感縣。本孝昌縣。宋孝武帝置。屬江夏郡。西魏置岳州及岳山郡。後周並廢。又有潁岳郡。隋開皇初廢。以縣屬安州。唐武德四年置潁州及潁陽縣。八年州廢。省潁陽入孝昌。來屬。元和三年省入雲夢。咸通中復置。後唐改爲孝感。有潁河鎮。九宗山。

中下應山縣。本東漢平春縣地。屬江夏郡。晉因之。宋屬義陽郡。後省。梁置永陽縣及應州。隋大業初州廢。改永陽爲應山。屬安陸郡。唐屬安州。有大龜山。石龍山。澗水。按水經。澗水出江夏平春縣。西南過安陸。入于澗。

上復州。春秋屬楚。秦屬南郡。二漢屬南江夏二郡。晉元康元年分置竟陵郡。宋齊因之。梁又置沔陽郡。後周置復州。隋因之。而郡廢。大業初州廢。復置沔陽郡。唐武德五年改爲復州。天寶元年又曰竟陵郡。石晉天福初改曰景陵郡。皇朝因之。熙寧六年州廢。後復置。今縣三。

緊景陵縣。楚封大夫鬬辛於此。是爲鄖公。戰國秦使白起攻楚。拔郢。東至竟陵。二漢屬江夏郡。晉置竟陵郡。後省入雲城。後周復改雲城爲竟陵。隋開皇初州自建興移治此。仁壽三年州仍治建興。正觀七年徙治沔陽。五代時又徙治此。皇朝熙寧六年州廢。屬安州。後復置。來屬。有巾水。戍山。晉元熙三年竟陵郡言巾水戍山得古銅鍾七枚。藏於相府。有漢水。夏水。

下沔陽縣。春秋鄖子之國。漢雲杜縣地。屬江夏郡。東漢晉因之。宋屬竟陵郡。後省。梁置沔陽郡。西魏省州。陵。惠懷二縣。置縣曰建興。後周置復州。隋開皇初州移治竟陵。仁壽三年州仍治建興。大業初改建興。

曰沔陽州廢。仍置沔陽郡。唐武德中屬復州。正觀七年州徙治此。五代時又徙治景陵。皇朝熙寧七年省入監利。後復置。來屬雲杜城。在縣西北。又有石城。在西南。西臨沔水。因山爲固。晉杜預爲荊州刺史。開陽口達巴陵。徑千餘里。內避長江之險。通零桂之漕。卽此。惠帝始置竟陵郡。治此。

下玉沙縣。皇朝乾德三年。以白沙院置。屬江陵府。至道三年。來屬熙寧六年。省入監利。元祐元年。復置。按唐地理志。郢州富水有白沙山。白沙水所出。而水經言江水過下雋東。得白沙口。謂白沙水入江處也。然則白沙院之取名。蓋以水所經矣。

上鼎州。春秋戰國皆屬楚。秦屬黔中郡。漢屬武陵郡。東漢晉末齊皆因之。梁置武州。後改曰沅州。隋平陳郡廢。改州曰朗州。大業初州廢。復置武陵郡。唐武德四年。平蕭銑。置朗州。天寶元年。復曰武陵郡。皇朝因之。大中祥符五年。改曰鼎州。今縣三。

望武陵縣。本漢臨沅縣。屬武陵郡。東漢爲郡治。晉宋齊梁陳皆因之。晉趙欽問潘京曰。貴郡何以名武陵。京云。鄙郡本名義陵郡。在辰陽縣界。與夷相接。數爲所敗。光武移東出。共議易號。傳曰止戈爲武。詩稱高平曰陵。隋廢郡。置朗州。改臨沅爲武陵縣。唐因之。皇朝改曰鼎州。故漢壽縣。本名索。漢爲武陵郡治。東漢陽嘉三年。更名爲荊州刺史治。而郡徙治臨沅。至魏州徙治江陵。吳改漢壽爲吳壽。晉復故。宋齊梁陳皆因之。隋省入武陵。有武陵山。桂山。上有善卷壇。有沅水。鼎水。枉渚。

望桃源縣。東漢沅南縣地。建武二十六年。屬武陵郡。晉宋齊梁陳皆因之。隋省入武陵。皇朝乾德元年。

析武陵置桃源縣。有桃源山。晉陶潛桃源記云。太元末。有漁人深入武陵溪。見桃花夾岸。居人衣服皆秦製。自言避秦。隱居數世矣。不知市朝之變。漁人既出。後再尋之。路迷終不能至。有沅水。

中龍陽縣。吳置。晉、宋、齊、梁、陳皆屬武陵郡。隋、唐屬朗州。有龍陽山。零水。有龍陽洲。吳李衡植柑於其上。臨死。謂其子曰。吾洲有木奴千頭。不責衣食。歲絹千疋。後柑成果如其言。

上澧州。春秋戰國皆屬楚。秦屬黔中郡。二漢屬武陵郡。吳孫休永安六年。分置天門郡。晉宋以後因之。隋平陳郡廢。置松州。尋改爲澧州。大業初。置澧陽郡。唐武德四年。平蕭銑。置澧州。天寶元年。曰澧陽郡。皇朝因之。今縣四。

望澧陽縣。晉太康四年。置屬天門郡。宋因之。後省焉。隋復置。及置澧州。大業初。置澧陽郡。唐爲澧州。有大浮山、崇山。昔舜放驩兜於此。有澧水、涔水、涔東南流入澧。

中下安鄉縣。東漢作唐縣地。後置安鄉縣。隋屬澧州。唐因之。作唐縣。東漢分孱陵置。屬武陵郡。晉置南平郡。宋、齊、梁、陳皆因之。隋開皇中。郡廢。改作唐爲孱陵。屬澧州。唐正觀元年。省入安鄉。亦漢壽縣地。有澧水。澧水。按水經注。澧水東逕安南縣南。澧水注之。水上承澧水於作唐。東逕其縣北。又東注于澧。謂之澧口龍。王仲宣詩所謂悠悠澧澧是也。

中下石門縣。漢零陽縣地。吳時。武陵充縣。松梁山有石洞。開廣數十丈。其高似弩仰射不至。名曰天門。孫休以爲佳祥。置天門郡於此。晉、宋、齊、梁、陳皆因之。隋開皇中。郡廢。置石門縣。屬澧州。唐因之。有層山水。

經注所謂澧水東歷層步山是也。有澧水、漆水。水東注澧水，謂之漆口。

下慈利縣。二漢零陵縣，屬武陵郡。晉宋屬天門郡。後省。隋開皇中，復置，屬澧州。十八年，改曰慈利。唐因之。亦澧中縣地。吳置。晉宋屬天門郡。後省。亦崇義縣地。後周置衡州。隋開皇中，置縣。十八年，改州曰崇州。大業初，州廢，屬澧陽郡。唐屬澧州。麟德元年，省入慈利。有九度山、澧水。

中峽州。春秋、戰國，屬楚。秦、二漢，屬南郡。魏武平荊州，分置臨江郡。劉備改爲宜都郡。吳、晉、宋、齊、梁，皆因之。兼置宜州。西魏改曰拓州。後周改曰硤州。隋開皇七年，郡廢。大業初，州廢，置夷陵郡。唐武德二年，復爲硤州。天寶元年，曰夷陵郡。皇朝因之。今縣四。

中夷陵縣。夷山在西北。縣以爲名。秦令白起伐楚，三戰而燒夷陵。卽此。二漢屬南郡。建安十五年，劉備以屬宜都郡。吳黃武元年，改曰西陵，以爲重鎮。郡城陸抗所築也。晉太康元年，復故名。宋、齊、梁、陳，皆因之。隋置夷陵郡。唐置硤州。巴山塞，本巴山縣。隋分長陽置，屬清江郡。後省。唐武德四年，復置，屬睦州。八年，屬東松州。正觀元年，屬硤州。天寶八載，省入長陽。五代時，復置。皇朝開寶八年，省入夷陵。有西陵山、虎牙山。石壁色紅，間有白文，類牙形焉。有黃牛硤。南岸高崖間，有色，加人牽牛狀。人黑牛黃。此巖旣高，加以江湍紆迴，行者謠曰：朝發黃牛，暮宿黃牛。三朝三暮，黃牛如故。

中宜都縣。二漢夷道縣地。屬南郡。劉備置宜都郡。晉、宋、齊、梁，皆因之。又析夷道置宜昌縣。隋開皇七年，郡廢。宜昌屬江陵府。大業初，夷道屬夷陵郡。唐武德二年，改宜昌爲宜都。以宜都及夷道置江州。六年，曰

東松州。正觀元年。州廢。省夷道人宜都。來屬。有荆門山。上合下開。通徹山南。有門象焉。大江東歷荆門。虎牙二山之間。荆門在南。虎牙在北。爲楚之西塞。故郭璞江賦曰。虎牙築起以屹峯。荆門闢竦而盤薄。圓淵九回以高騰。溢流雷响而電激也。東漢建武中。岑彭擊荆門。破公孫述將任滿田戎於此。有勾將山。夷水自施州東北流。至縣北。注大江。卽清江水也。

中下長陽縣。本佷山。漢屬武陵郡。東漢屬南郡。晉屬宜都郡。太康元年。改爲興山。後復故。宋因之。後改爲長陽。隋屬江陵府。唐武德四年。置睦州。八年。州廢。屬東松州。正觀元年。州廢。來屬。故鹽水縣。後周置。及立亭州。資曰郡。隋開皇初。郡廢。大業初。改州爲庸州。又廢爲清江郡。後郡徙而縣省。唐武德四年。復置。屬睦州。八年。省入長陽。昔巴蠻廩君乘土舡。從夷水下。至鹽陽。射殺神女。又下及夷城而居之。蓋此地也。有佷山。出藥草。恆山。世以銀爲音。有長陽溪。出射堂村東六七里谷中。有石穴。清泉瀆流三十許步。復入穴。其水重源顯發。北流。注于夷水。

中下遠安縣。本東晉沮陽縣地。義熙初。分置高安縣及汝陽郡。後周改縣曰遠安。隋開皇七年。郡廢。屬峽州。唐因之。有沮水。東南流。逕當陽枝江縣。入于江。謂之沮口。

輿地廣記卷第二十八

荊湖北路下

下岳州古三苗國地。春秋戰國屬楚。秦屬長沙郡。二漢因之。晉元康元年置建昌郡。咸康元年省。宋元嘉十六年置巴陵郡。齊梁陳皆因之。梁兼置巴州。隋平陳郡廢。改州爲岳州。大業初改曰羅州。復置巴陵郡。唐武德四年平蕭銑置巴州。六年改爲岳州。天寶元年曰巴陵郡。皇朝因之。今縣五。

上巴陵縣。二漢下雋縣地。吳爲巴丘邸閣。晉太康元年置巴陵縣。屬長沙郡。宋置巴陵郡。梁置巴州。隋改爲岳州。唐因之。吳使魯肅万彘。東晉使陶侃皆守巴陵。以爲重鎮。有大江。洞庭湖。有資水。沅水。澧水。湘水。同注洞庭。北會大江。名之五渚。戰國策云。秦與荆戰。大破之。取洞庭五渚。謂此也。湖水圓廣五百餘里。日月若出沒於其中。有君山。扁山。君山卽湘山也。以湘君之所遊處。因曰君山。有石穴。與太湖之苞山潛通。故太湖亦有洞庭山。君山東北對扁山。兩山相次。去數十里。回峙相望。孤影若浮。有青草湖。望華容縣。漢孱陵縣地。晉武帝時置安南縣。屬安平郡。宋因之。隋開皇十八年改曰華容。屬岳州。唐因之。垂拱二年更名容城。神龍元年復故。有方臺山。赤亭湖。近湖有赤亭城。梁元帝使胡僧祐陸法和等據赤亭。擊破侯景軍。擒其將任約。卽此。

上平江縣。本漢昌縣地。東漢置。吳曰吳昌。晉宋因之。屬長沙郡。隋平陳省入羅。唐省羅入湘陰。神龍三年。

分湘陰置昌江縣。屬岳州。後唐改曰平江。有汨水。四至湘陰。入湘。有廬水。

中臨湘縣。本巴陵縣之王朝場。皇朝淳化四年。升爲王朝縣。至道二年。改爲臨湘。有陵城山。大江。

中沅江縣。漢益陽縣地。梁置樂山郡。及樂山縣。隋平陳。郡廢。改縣曰安樂。屬岳州。十八年。改曰沅江。唐因之。乾寧中。改曰橋江。五代時。屬朗州。皇朝乾德元年。復曰沅江。來屬。有楓山。沅水。

下歸州。春秋爲夔子國。楚人滅之。及戰國。皆屬楚。秦屬南郡。二漢因之。吳永安三年。置建平郡。晉亦爲建平郡。宋因之。後周置秭歸郡。隋開皇初。郡廢。屬信州。大業初。屬巴東郡。唐武德二年。分夔州置歸州。天寶九年。曰巴東郡。皇朝因之。今縣三。

下秭歸縣。故夔子國。其先熊摯。本楚之嫡嗣。以疾不立。而封於夔。春秋時。夔子不祀。祝融與鬻熊曰。我先君有疾。鬼神弗赦。而自竄於夔。我是以失楚。又何祀焉。楚人滅之。二漢爲秭歸縣。屬南郡。晉宋屬建平郡。其地險固。孫皓末。晉將王濬自蜀沿江伐吳。吳守將吾彥表謂皓曰。增建平兵。若建平不下。晉師終不敢過。皓不從。卽秭歸縣界。後周置秭歸郡。隋郡廢。屬信州。唐置歸州縣。東南有丹陽城。周成王封楚子熊繹。始居於此。後徙都枝江。亦曰丹陽縣。北百餘里。有楚大夫屈原故宅。名曰樂平里。原旣被流放。忽然暫歸。有賢姊曰女須。亦歸。喻令自寬。離騷所謂女須之嬋媛兮。申申其罵予也。袁山松以爲秭歸之名始於此。而酈道元引樂緯云。昔歸典聲律。宋忠注云。歸卽夔也。則知古人通音同字。不必因屈原也。有空舂峽。大江。

下巴東縣。漢巫陽縣地。宋有歸鄉縣。屬建平郡。初在秭歸之東。後徙置於此。梁置信陵郡。後周郡廢。改歸鄉曰樂鄉。隋開皇末。又改曰巴東。屬信州。唐武德二年。來屬。有石門山。在大江北岸。洞達東西。劉備爲陸遜所破。走逕北門。追者甚急。躡山越險。僅乃得免。遂發憤而薨。

下興山縣。吳置。屬建平郡。晉因之。宋省焉。唐武德三年。析秭歸復置。屬歸州。皇朝熙寧五年。省入秭歸。後復置。有古夔子城。有昭君村。漢宮女王嬙。此鄉人也。

下辰州。古蠻夷地。春秋戰國。屬楚。秦昭襄王三十年。取楚巫黔及江南地。置黔中郡。漢高帝二年。改爲義陵郡。在辰陽縣界。與蠻夷相接。數爲所攻破。光武時。郡治東徙臨沅。遂改爲武陵郡。而此地屬焉。晉宋齊。因之。後置沅陵郡。隋平陳。郡廢。置辰州。大業初。州廢。復沅陵郡。唐武德四年。平蕭銑。置辰州。天寶元年。曰盧溪郡。皇朝因之。今縣四。

中沅陵縣。二漢。晉。宋。齊。皆屬武陵郡。後置沅陵郡。隋置辰州。唐因之。縣東有壺頭山。高一百里。圓廣三百里。東漢馬援征蠻。從壺頭進軍。遇瘴。沒於此。有小西山。沅水。西溪。其水東南注于沅。謂之西口。

中下淑浦縣。本漢義陵縣。屬武陵郡。東漢省之。唐武德五年。分辰溪置淑浦縣。屬辰州。有淑溪。其水出鄜梁山。西北注于沅。楚詞所謂入淑浦。余遭迴兮。迷不知吾之所如。卽此水也。最爲沃壤。特宜稻焉。其城則劉備所築。

下辰溪縣。二漢辰陽縣。屬武陵郡。晉省之。宋復置。屬武陵。隋平陳。改曰辰溪。屬充州。大業初。州廢。屬沅陵。

郡。唐屬辰州。有五城山。辰溪縣治。舊在辰水之北。楚詞所謂夕宿辰陽是也。

下盧溪縣。本沅陵縣地。唐武德五年。析置盧溪縣。屬辰州。有武山。武溪所出。東南流。注于沅。水源石上有磐瓠跡。猶存。磐瓠者。高辛氏之狗。嚙犬戎吳將軍頭。致於闕下。帝妻以少女。磐瓠負女入南山上石室中。生六男六女。自相夫妻。後遂滋蔓。今五溪蠻夷卽其種也。

下沅州。古蠻夷地。春秋戰國。皆屬楚。秦屬黔中郡。二漢。晉。宋。屬武陵郡。梁。陳。屬沅陵郡。隋屬辰州。唐正觀八年。以辰州之龍標縣置巫州。天授二年。曰沅州。開元十三年。以沅原聲相近。復曰巫州。天寶二年。曰潭陽郡。大曆五年。改爲敘州。唐衰。沒于溪洞。皇朝熙寧七年。收復置沅州。兼得錦獎二州之地。今縣三。下盧陽縣。本漢無陽縣地。屬武陵郡。東漢省之。晉。宋。爲舞陽。後省。梁置龍標縣。屬沅陵郡。隋屬辰州。唐析龍標置潭陽縣。屬敘州。皇朝熙寧七年。以其地置盧陽縣。爲沅州治焉。鎮江鋪。本龍標縣地。唐置敘州。熙寧五年。以其地置寨。元豐三年。廢爲鋪。龍門鋪。本龍門縣地。唐垂拱四年。析麻陽置。屬辰州。尋省。熙寧七年。以其地置鋪。獎州鋪。唐獎州地也。

下麻陽縣。唐武德三年。分沅陵。辰溪置。屬辰州。熙寧七年。來屬。唐招諭縣。垂拱三年置。屬錦州。後省。皇朝太平興國七年。析麻陽復置。屬辰州。熙寧七年。來屬。八年。省入麻陽。故錦州寨。唐錦州地也。有辰山。辰溪。

下黔陽縣。本罽城縣地。二漢及晉。屬武陵郡。宋省焉。唐正觀八年。置朗溪縣。屬敘州。後置黔江城。皇朝元

豐三年升爲黔陽縣。有紫霄山、七寶山、沅水、舞水。

下靖州。古蠻夷地。唐爲溪洞誠州。皇朝熙寧九年收復。仍置。元祐二年廢爲渠陽軍。三年廢爲寨。屬沅州。紹聖中復置誠州。崇寧二年改爲靖州。今縣三。

下永平縣。本沅州貫保寨地。皇朝元豐六年置渠陽縣。爲誠州治。崇寧二年改爲永平。有勝山、渠河。

會同縣。本三江。崇寧二年改名。

通道縣。本羅蒙。崇寧二年改名。

同下州。漢陽軍。春秋屬鄖。後及戰國屬楚。秦屬南郡。二漢屬江夏郡。晉、宋、齊因之。梁屬沔陽郡。後周屬復州。隋屬沔州。州廢。屬沔陽郡。唐武德四年平朱粲。置沔州。建中二年州廢。四年復置。寶曆二年州又廢。屬鄂州。周置漢陽軍。皇朝因之。熙寧四年軍廢。屬鄂州。元祐元年復置。今縣二。

望漢陽縣。本安陸縣地。二漢及晉屬江夏郡。東晉置沌陽縣。宋因之。後省。隋開皇十七年置漢津縣。屬復州。大業初改曰漢陽。唐屬沔州。州廢。屬鄂州。周置漢陽軍。皇朝因之。有魯山、大江、漢水、沌水、澠水。漢入江處謂之沔口。漢末魏及吳人皆以爲重鎮。禹貢漢水至于大別。南入于江。今縣蓋古大別之地也。

下漢川縣。本安陸縣地。梁置梁安郡。西魏改曰魏安郡。尋改曰汶川郡。隋開皇初郡廢。唐武德四年析漢陽置汶川縣。屬沔州。州廢。屬鄂州。周屬安州。皇朝太平興國二年改曰漢川。屬漢陽軍。亦周隋甌山縣地。

同下州荆門軍。五代以前地理與江陵府同。皇朝開寶五年置荆門軍。熙寧六年廢。元祐元年復置。今縣二。

中長林縣。本編縣地。二漢、晉、宋皆屬南郡。後廢焉。而置長林、長寧二縣。隋開皇十一年省長林入長寧。十八年改長寧曰長林。屬江陵府。唐武德四年於縣東北置基州及章山縣。七年州廢。以章山隸郢州。郢州廢。來屬。八年省入長林。正元二十一年析置荆門縣。後省。皇朝置荆門軍。軍廢。屬江陵府。後復置。皆爲軍治。有章山。禹貢所謂內方也。有漢水、漳水、漕水。

下當陽縣。二漢、晉、宋、齊、梁屬南郡。後周置平州。屬梁蕃。隋開皇七年改爲玉州。九年州廢。屬江陵府。梁又置安居縣。十八年改曰昭丘。大業初改曰荆臺。尋省入當陽。唐武德四年復置平州。六年改曰玉州。八年州廢。屬荆州。皇朝置荆門軍。初治此。後徙治長林。軍廢。屬江陵府。後復置。來屬。二漢臨沮縣。屬南郡。晉屬襄陽郡。宋復屬南郡。後省。唐武德四年析當陽復置。屬平州。八年省入當陽縣。有綠林山在縣東。卽所謂當陽長阪也。曹公追劉備。而張飛橫矛拒之於此。有麥城。關羽保麥城。詐降而遁焉。爲潘璋所斬。有沮水、漳水。皆東南流入于江。而麥城在二水間。王粲於此登樓而賦之曰。夾清漳之通浦。倚曲沮之長洲。是也。

荆湖北路化外州

下錦州。歷代地理與辰州同。唐垂拱二年析辰州麻陽縣地及開山洞置錦州。天寶元年曰盧陽郡。統縣

五。

中下盧陽縣。

中下渭陽縣。

中下招諭縣。今省入沅州麻陽。

中下常豐縣。本萬安縣。天寶元年更名。

中下洛浦縣。天授二年。析辰州之大鄉置。屬溪州。後來屬。

下獎州。歷代地理與辰州同。唐天授二年。析沅州之夜郎、渭溪、二縣置舞州。開元十三年。以舞武聲相近。

更名鶴州。二十年。曰業州。天寶元年。曰龍溪郡。大曆五年。改爲獎州。統縣三。

中下峩山縣。本夜郎。天寶元年更名。

中下渭溪縣。天授二年。析夜郎置。

中下梓薑縣。本屬充州。天寶三年。廢爲羈靡州。以縣來屬。

下溪州。歷代地理與辰州同。唐天授二年。析辰州之大鄉置。天寶元年。曰靈溪郡。統縣二。

上大鄉縣。漢沅陵、零陽、二縣地。屬武陵郡。梁置大鄉縣。屬沅陵郡。隋屬辰州。唐置溪州。以五溪相會此地。

故以爲名。

中下三亭縣。正觀九年。析大鄉置。有黔山、大西山。

輿地廣記卷第二十九

成都府路上

次府成都府。自三代以前爲蜀國。其君曰蠶叢。曰伯雍。曰魚臯。曰杜宇。曰開明。相繼王之。周武王伐商。蜀人從焉。牧誓所謂庸蜀是也。秦惠王時。巴蜀相攻。惠王乃使張儀司馬錯等伐蜀。取之。置蜀郡。西漢因之。蜀王本治廣都樊鄉。儀旣平蜀。乃自赤里街移治於少城。儀所築也。謂之龜城。至昭王時。李冰爲蜀守。穿二江行成都中。以灌溉土田。蜀由此爲沃野。蜀人始未知學。漢景帝時。文翁爲蜀守。乃立學官。教民以經術文藝。於是蜀之學者比齊魯焉。武帝置益州以統之。王莽敗。公孫述據蜀。光武遣吳漢討平之。亦爲蜀郡。東漢末。劉焉爲益州牧。始自廣漢之雒。移治於成都。其子璋爲劉備所取。據其地。魏咸熙中。遣鄧艾伐取之。晉武帝改爲成都國。尋復置蜀郡。兼爲益州刺史治。惠帝之末。李特僭號於蜀。後桓溫滅之。其地復爲晉有。安帝時。譙縱又竊據之。爲朱齡石所滅。宋及齊。梁皆因晉舊。後周令尉遲迥克而有之。州郡復因梁焉。隋開皇初。郡廢。大業初。復置唐武德初。改爲益州。天寶元年。又改爲蜀郡。十五載。明皇幸蜀。駐蹕成都。至德二年。駕迴秦京。乃改蜀郡爲成都府。又分爲劍南西川節度。唐末。王建據之。而滅於後唐。孟知祥又據之。皇朝乾德三年。王師克蜀。太平興國六年。降爲益州。端拱元年。復升成都府。劍南西川。淳化五年。復爲益州。嘉祐四年。復升爲府。六年。復爲劍南西川。今縣九。

次赤成都縣。在府西。古蜀國也。秦既平蜀。張儀築成都以象咸陽。爲蜀郡治。西漢因之。漢末。又爲益州刺史治焉。晉、宋、齊、梁、陳。皆因之。唐爲成都府治。成都舊謂之錦官城。言官之所織錦也。亦猶合浦之珠官云。又或名之曰錦里城。北有升仙橋。蜀人司馬相如將入長安。題其柱曰。不乘高車駟馬。不過汝下。後奉使歸蜀。果如志焉。李冰沿水造橋。上應七星。曰冲理橋。曰市橋。曰江橋。曰萬里橋。曰笮橋。曰永平橋。曰長升橋。吳漢伐公孫述。光武謂漢曰。安軍宜在七星間。蓋謂是也。沱江鎮。以沱水之所經爲名。禹貢言岷山導江。東別爲沱。而爾雅亦言江有沱。凡江之別出者。皆曰沱。非獨此有之。故禹治水於荊州之域。亦曰浮于江沱潛漢也。武擔山。蜀王紀云。武都山精化爲女子。蜀王納以爲妃。妃死。王憐之。令五丁力士。擔土於成都爲冢。以葬妃。故曰武擔。今山上有石照存焉。

次赤華陽縣。在府東。本成都縣地。唐正觀十七年。析置蜀縣。乾元元年。更名華陽。昔人論蜀之繁富曰。地稱天府。原號華陽。故晉常璩作蜀書。誦之華陽國志。縣之得名。實本諸此。府學有石室。漢蜀守文翁興學。後人作石室以奉祠之。

次畿新都縣。漢舊縣也。故城在今縣東。屬廣漢郡。晉置新都郡於雒。而以縣屬焉。隋開皇十八年。改新都縣曰興樂。大業初。省興樂入成都。唐武德二年。復置新都縣。屬益州。

次畿郫縣。漢舊縣也。故城在今縣北。屬蜀郡。晉、宋、齊、梁、周、隋。皆因之。唐屬益州。蜀王杜宇。號曰望帝。都郫。有墓在焉。犀浦鎮。本成都縣地。唐垂拱二年。析置犀浦縣。屬益州。秦時。李冰作石犀五。以厭水精。穿石。

犀渠於南江。命之曰犀牛里。縣取此以爲名耳。不在其地也。皇朝熙寧五年。省爲鎮。入郫縣。

次畿雙流縣。本漢廣都縣。後置寧蜀郡。後周郡廢。屬蜀郡。隋仁壽元年。以太子名廣。故改曰雙流。唐屬益州。秦時李冰穿二江行成都中。故左思蜀都賦云。帶二江之雙流。按外江在今羅城之南。笮橋下。內江在今子城之南。衆安橋下。自唐乾符中。高駘築羅城。遂作糜棗堰。轉內江水。從城北流。又屈而南。與外江水合。故今子城之南不復成江。然則二江雙流。未嘗歷此縣之境。特取蜀中事而名之耳。

次畿溫江縣。本郫縣地。西魏析置溫江縣。隋開皇初。省入郫。仁壽初。復置萬春縣。大業初。又省。唐武德三年。復置萬春縣。屬益州。正觀元年。更名溫江。有新源水。開元二十三年。長史章仇兼瓊因蜀王秀故渠。益開通之。以漕西山竹木。

次畿新繁縣。漢曰繁縣。屬蜀郡。晉因之。唐爲新繁。屬益州。

次畿廣都縣。本漢舊縣地。隋既改廣都曰雙流。唐龍朔二年。又析雙流置廣都縣。屬益州。

次畿靈泉縣。本漢成都縣地。唐久視元年。析蜀縣置東陽縣。屬益州。天寶元年。更名靈池。皇朝天聖四年。改曰靈泉。

上眉州。秦屬蜀郡。漢屬犍爲郡。晉宋皆因之。齊置齊通郡。梁及後周皆因之。隋開皇初。廢齊通。入眉山郡。唐武德二年。析嘉州置眉州。天寶元年。改爲通義郡。後復爲眉州。皇朝因之。統縣四。

望眉山縣。本漢武陽縣地。後分置齊通縣。爲齊通郡治。梁及後周皆因之。隋開皇初。郡廢。改齊通曰廣通。

仁壽元年改爲通義。唐置眉州。皇朝太平興國元年改爲眉山。按西魏置眉州。隋置眉山郡。皆在今嘉州。其後州縣之名遷於此耳。

望彭山縣。本漢武陽縣。屬犍爲郡。東漢爲郡治焉。晉因之。後郡遷于犍道。乃改武陽爲犍爲縣。置江州。西魏改縣曰隆山。以縣有鼎臯山。地形隆起故也。後周省州。置隆山郡。隋開皇初屬陵州。唐正觀元年省隆山入通義。二年復置。來屬。先天元年改爲彭山。取彭女山爲名。有彭亡聚。相傳彭祖亡於此。後漢岑彭伐公孫述。次其地。惡之。會夜。不及徙營。果爲述刺客所殺。黃龍鎮在赤水口。漢末黃龍見于武陽赤水。劉先主以爲受命之祥。

望丹稜縣。南齊置齊樂縣。後周因之。隋開皇初改曰丹稜。屬嘉州。唐武德二年來屬。

望青神縣。本漢南安縣地。後周置青神縣及青神郡。隋開皇初郡廢。屬嘉州。唐武德二年來屬。舊治思濛水口。八年移於今治。昔蠶叢氏衣青衣以勸農桑。縣蓋取此爲名。

緊蜀州。秦二漢屬蜀郡。晉永和中桓溫平蜀。置晉原郡。宋齊屬晉康郡。後周廢。隋屬蜀郡。唐垂拱二年析置蜀州。天寶元年曰唐安郡。皇朝因之。今縣四。

望晉原縣。本漢江原縣。屬蜀郡。李雄據蜀。置江原郡。桓溫克之。置晉原郡。縣爲多融。後周郡廢。改縣爲晉原。隋屬蜀郡。唐垂拱二年置蜀州。

望新津縣。本漢武陽縣地。後周置新津縣。以爲犍爲郡治焉。隋開皇初郡廢。屬蜀郡。唐垂拱二年來屬。有

天社山通濟堰自邛江口引渠南下百二十里至眉州西南入江。溉由千六百頃。唐開元二十八年採訪使章仇兼瓊開。

望江原縣。本漢江原縣地。後魏置夔道縣。大業初省入新津。唐武德二年復置唐隆縣。屬益州。垂拱二年來屬。長壽二年改曰武隆。神龍元年復曰唐隆。先天元年更名唐安。後又曰唐興。皇朝開寶四年改唐興曰江原。

望永康縣。本青城縣之橫渠鎮。孟蜀廣政中置永康縣。屬蜀州。有天國山。

緊彭州。秦二漢及晉屬蜀郡。桓溫平蜀置寧蜀郡。梁置東益州。西魏置天水郡。後周州廢。置九隴郡。隋開皇初郡廢。仁壽初置濛州。大業初州廢。屬蜀郡。唐武德三年復置濛州。正觀三年又廢。垂拱二年置彭州。以天彭山爲名。漢湔氏道有天彭山。兩山相對其形如闕。謂之天彭門。亦曰天彭闕。江水逕其間。今在茂州。特取其名耳。天寶元年曰濛陽郡。皇朝因之。今縣三。

望九隴縣。本漢繁縣地。晉置晉壽縣。後周改爲九隴。及置九隴郡。隋屬蜀郡。唐置彭州。武后時益州長史劉易從。決唐昌沱江。鑿川派流。合壩口琅岐水。溉九隴唐昌田。民爲立祠。有九隴山。

望崇寧縣。唐儀鳳二年析九隴導江。郫縣置唐昌縣。屬益州。垂拱二年來屬。長壽二年改爲周昌。神龍初復故名。皇朝開寶四年改爲永昌。崇寧中改爲崇寧。

望濛陽縣。唐儀鳳二年析九隴。什邡。雒縣置屬益州。垂拱二年來屬。有瀾濛水。

上綿州。秦屬蜀郡。漢屬廣漢郡。晉、宋、齊屬梓潼郡。後置巴西郡。西魏兼置潼州。隋開皇初郡廢。改潼州曰綿州。以綿水爲名。大業初州廢。置金山郡。唐武德元年復爲綿州。天寶元年曰巴西郡。皇朝因之。今縣入望巴西縣。本漢涪縣。屬廣漢郡。後漢伐公孫述。裨將臧宮進破涪城。斬公孫恢。卽此。西魏改涪曰巴西。隋置金山郡。唐置綿州。有涪水。

望彰明縣。本漢涪縣地。後置漢昌縣。西魏改爲昌隆。隋屬金山郡。唐屬綿州。先天元年改曰昌明。後唐改曰彰明。有涪水。有唐李白碑。白之先世嘗流雋州。其後內移。白生於此縣。

緊魏城縣。本漢涪縣地。西魏置。隋屬金山郡。唐屬綿州。

緊羅城縣。本漢涪縣地。後置屏亭縣。西魏改爲萬安。及置萬安郡。隋開皇初郡廢。屬金山郡。唐屬綿州。天寶元年改爲羅江。桉水經注。潺水出潺山。水源有金銀。歷潺亭而下注涪水。今羅江卽古之潺亭。則羅江水亦古所謂潺水歟。有羅瓊化江。因以爲名。

上神泉縣。本漢涪縣地。後置西充國。隋開皇十六年改曰神泉。以縣西有泉能愈疾故也。屬金山郡。唐屬綿州。有綿水。

上龍安縣。本金山縣。後周置。隋屬金山郡。唐屬綿州。武德三年更名龍安。有龍安山。西北有松嶺關。西昌鎮。本益昌縣。隋開皇四年省入金山。唐永淳元年復置西昌縣。屬綿州。皇朝熙寧五年省爲鎮。入龍安。中鹽泉縣。唐武德三年析魏城置。屬綿州。有梓潼水。

下石泉縣。本漢廣柔縣地。屬蜀郡。隋爲汝山縣地。屬汝山郡。唐正觀八年。析置石泉縣。屬茂州。皇朝熙寧九年。來屬。有石紐山。禹之所生也。華陽國志云。夷人營其地。方百里。不敢居牧。畏禹神靈也。

上漢州。秦屬蜀郡。漢屬廣漢郡。東漢爲郡治。兼爲益州刺史治焉。晉置新都郡。宋齊爲廣漢。晉熙二郡。隋開皇初。郡廢。屬蜀郡。唐垂拱二年。分置漢州。天寶元年。爲德陽郡。皇朝因之。今縣四。

上雒縣。漢屬廣漢郡。東漢爲益州刺史治。至劉焉。乃徙治成都。晉置新都郡。宋齊爲廣漢郡。隋屬蜀郡。唐置漢州。洛水出章山。南逕雒縣。因取名焉。劉備自涪攻雒。龐士元中流矢死於此。有嚴君平卜臺。

望什邡縣。漢屬廣漢郡。高帝封雍齒爲侯國。晉屬新都郡。後周置。曰方寧。隋省之。唐武德二年。析雒縣復置什邡。屬漢州。有洛通山。卽古章山也。洛水所出。

望綿竹縣。漢屬廣漢郡。故城在縣東。晉屬新都郡。後置晉熙郡。隋開皇初。郡廢。爲晉熙縣。十八年。改曰孝水。大業三年。復曰綿竹。唐武德三年。屬濛州。正觀二年。州廢。屬益州。垂拱二年。來屬。有紫巖山。綿水所出。孝泉鎮。東漢姜詩所居。詩至孝。母好飲江水。嗜魚膾。舍側忽有涌泉。常出雙鯉。

望德陽縣。本綿竹縣地。東漢析置。屬廣漢郡。晉因之。後周廢焉。唐武德三年。分雒縣復置。屬益州。垂拱二年。來屬。魏將鄧艾自油江出綿竹。破蜀將諸葛瞻於此。因築京觀。有鹿頭關。唐高崇文破劉闢守兵於此。有劍閣道三十里。至險。

上嘉州。秦屬蜀郡。二漢屬犍爲郡。晉、宋、齊、梁。皆因之。西魏置眉州。取義眉山爲名。後周改曰青州。取青衣

水爲名。後又改曰嘉州。取漢嘉郡爲名。隋大業初。置眉山郡。唐武德元年。復曰嘉州。天寶元年。曰犍爲郡。皇朝因之。今縣五。

上龍遊縣。本漢南安縣。初屬蜀郡。故鄧通在文帝景帝時。而其傳云。蜀郡南安人也。武帝平夜郎。置犍爲郡。乃以南安爲之屬縣焉。東漢以後。皆因之。後周置峨眉縣。隋開皇九年。改曰青衣。隋軍伐陳。有龍見于江。引舟而進。十年。改曰龍遊。唐屬嘉州。自西魏以來。置眉州。青州。嘉州。眉山郡。皆治此。漢之青衣。本屬蜀郡。其地於今爲雅之廬山。名山。公孫述據蜀。青衣不賓。光武嘉之。陽嘉二年。改曰漢嘉。劉先主因置漢嘉郡。領漢嘉。徙陽。嚴道。旄牛。四縣。實今之雅州。廬山。名山地也。青衣水出廬山。徼外。東南流。逕嚴道。洪雅。夾江至龍遊。而與岷江合。龍遊居青衣水口。有青水山。青衣津。故前世於是置青州。嘉州。不知龍遊乃南安故地。非青衣。漢嘉本土也。唐顏師古注漢書彭越傳。杜佑述通典嘉州事。皆以龍遊爲青衣。蓋失之矣。平羌鎮。本漢南安縣地。後周置平羌縣。及平羌郡。隋開皇初。郡廢。屬眉山郡。皇朝熙寧五年。省入龍遊。有熊耳峽。諸葛忠武鑿山開道。蓋今湖瀼峽云。

上洪雅縣。後周洪雅鎮。隋開皇十三年。置縣。屬眉山郡。唐武德元年。置犍州。正觀元年。州廢。屬眉州。開元七年。置義州。并以獠戶置南安。平鄉。二縣。八年。州廢。省二縣。以洪雅屬眉州。皇朝淳化四年。來屬中夾江縣。本漢南安縣地。隋開皇三年。析龍遊。平羌置屬眉山郡。唐屬嘉州。舊治涇上。武德元年。移於今治。

中峨眉縣。本漢南縣地。隋開皇十三年置。屬眉山郡。唐屬嘉州。有峩眉山、大渡河、綏山鎮。隋招致生獠於榮樂城。置綏山縣。取旁山以爲名。唐屬嘉州。皇朝乾隆四年省入峨眉。

下犍爲縣。本武陽縣。後周置。隋開皇初改曰犍爲。屬戎州。唐上元元年來屬。其後遂以嘉州爲犍爲郡。按漢武帝開夜郎。置犍爲郡。因山立名。初治犍縣。其他蓋在今瀘南徼外。後徙治犍道。今戎州是也。東漢及晉徙治武陽。今眉州彭山是也。始雖因平夜郎以置犍爲。然郡之北境大半本巴蜀舊縣。如南安、武陽、牛鞞、資中、江陽、犍道是也。而漢史地理志夜郎縣乃屬牂牁郡。則知今嘉州非夜郎故也。夜郎蓋於今爲珍播等州。人徒見嘉州號犍爲郡。及領犍爲縣。遂以爲本夜郎國。杜佑述通典亦承誤焉。郡之東山有大石雙峙。說者以爲唐蒙開夜郎立此石闕以表之。抑又妄矣。

上邛州。秦屬蜀郡。二漢及晉皆因之。宋齊屬晉康郡。梁置邛州。西魏因之。及置臨邛郡。隋開皇初郡廢。大業初州廢。屬臨邛郡。唐武德元年置邛州。天寶元年曰臨邛郡。今縣六。

望臨邛縣。漢晉屬蜀郡。西魏置臨邛郡。隋開皇初郡廢。唐顯慶二年邛州自依政徙治焉。漢司馬相如酤酒。令文君當爐。相如滌器於市中。卽此臨溪鎮。本臨邛縣地。西魏分置臨溪縣。隋省之。唐復置。屬邛州。皇朝熙寧五年省入臨邛。

望依政縣。本臨邛縣地。梁置邛州。西魏因之。及置依政縣。隋大業初州廢。唐初邛州治此。後徙治臨邛。望安仁縣。唐武德三年析臨邛依政置。屬邛州。正觀十七年省。咸亨元年復置。有斜江水。

望大邑縣。唐咸亨二年。析益州之晉原置。屬邛州。有鸛鳴山。後漢張道陵隱居于此。著作符書。有斜江水。上蒲江縣。本臨邛縣地。西魏置廣定縣及蒲原郡。隋開皇初。郡廢。仁壽初。改廣定曰蒲江。屬臨邛郡。唐曰蒲江。屬邛州。有蒲江水。

中火井縣。本臨邛縣地。後周置火井鎮。隋末。升爲縣。唐屬邛州。有火井。舊說云。欲出其火。先以家火投之。須臾。隆隆如雷聲。爛然通天。光曜十里。左思蜀都賦云。火井沉熒於幽泉。高焰飛煽於天垂。今無復見矣。有邛池。李膺記曰。臨邛老姥得水蛇。飼之。漸長丈餘。後姥爲令所殺。蛇見夢於令曰。我當報仇。是夜。四十里俱陷爲湖。按。陷池在邛都。今爲化外。舊州。非臨邛也。

輿地廣記卷第二十

成都府路下

上黎州漢屬蜀越嶲二郡晉時李特據蜀置漢源郡後周置黎州隋仁壽初置登州大業初州廢唐武德元年復置九年又廢大足元年置黎州神龍三年州廢開元四年復置天寶元年曰洪源郡後曰漢源郡今縣一

下漢源縣本嚴道縣地李特置漢源郡桓溫平蜀廢之隋大業初置漢源縣屬臨邛郡唐武德四年置登州九年州廢屬雅州正觀二年屬嶲州永徽三年復故大足元年置黎州取古沉黎郡爲名有邛峽九折坂漢王陽爲益州刺史行部至此嘆曰奉先人遺體奈何數乘此險後王尊爲刺史至坂叱其馭曰驅之王陽爲孝子王尊爲忠臣漢源鎮本縣所治後徙治於州郭而以故縣爲鎮通望鎮本陽山縣唐武德元年析嶲州之臺登置屬登州九年州廢屬雅州正觀二年屬嶲州大足元年屬黎州天寶元年改曰通望皇朝慶曆七年省入漢源故飛越縣唐儀鳳二年析漢源置以飛越山爲名初屬雅州後屬黎州五代之際省入漢源按沉黎郡本葭都地漢武帝開之置郡旣而罷之李特據蜀復置沉黎郡桓溫平蜀廢宋齊以來復置後周置黎州及沉黎郡尋並廢隋開皇初置沉黎縣仁壽初置登州大業初州廢後縣亦省其地在今化外嶲州之域所謂古沉黎城是也

上雅州秦屬蜀郡。西漢因之。東漢爲蜀郡屬國。劉備置漢嘉郡。晉因之。永嘉後亂離。此地蕪廢。西魏開生獠。置蒙山郡。隋初郡廢。置雅州。煬帝初州廢。置臨邛郡。唐復曰雅州。天寶元年曰廬山郡。今縣五。

中嚴道縣。漢屬蜀郡。漢制縣有蠻夷曰道。晉屬漢嘉郡。西魏置始陽縣及蒙山郡。隋開皇初郡廢。十三年改始陽曰蒙山。尋置雅州。大業初置臨邛郡。改蒙山縣曰嚴道。唐復曰雅州。有蔡山。禹貢所謂蔡蒙旅平是也。今日周公山。始陽鎮。本漢徙縣屬蜀郡。晉曰徙陽。屬漢嘉郡。西魏曰始陽。唐以爲鎮。

上廬江縣。本漢青衣縣地。屬蜀郡。隋置廬山鎮。仁壽末升爲縣。屬臨邛郡。唐屬雅州。儀鳳二年析置大渡縣。長安二年省靈關寨。本漢靈關道。屬越巂郡。後廢。唐初置靈關縣。武德六年省。晉左思蜀都賦云。廓靈關而爲門。謂此也。

中名山縣。本漢青衣縣地。西魏置蒙山縣。隋開皇十三年改始陽曰蒙山。而改蒙山曰名山。屬臨邛郡。唐屬雅州。漢彭越徙蜀青衣。蓋在此也。有禹貢蒙山。

中百丈縣。唐武德中置百丈鎮。正觀八年升爲縣。屬雅州。有百丈山。

中下榮經縣。本嚴道縣地。晉屬漢嘉郡。唐武德三年置榮經縣。屬雅州。有邛崃山。漢淮南厲王徙嚴道邛郵。卽此。有故銅山。漢文帝賜鄧通嚴道銅山。得自鑄錢。蓋此山也。

上茂州。本冉駹國。漢武帝開其地。置文山郡。尋罷。屬蜀郡。東漢靈帝時復置汶山郡。晉宋齊皆因之。梁置繩州及北部郡。後周改繩州曰汶州。隋初郡廢。改汶州爲蜀州。尋改曰會州。大業初州廢。復置汶山郡。唐

武德元年。復曰會州。四年。曰南會州。正觀八年。更名茂州。取茂濕山爲名。天寶元年。曰通化郡。今縣二。下汶山縣。本漢汶江。滿氏三縣地。文山郡治焉。故城在今縣北二里。郡罷。屬蜀郡。後復置汶山郡。及汶山縣。晉因之。宋曰廣陽縣。梁置北部郡。開皇初。郡廢。屬會州。仁壽元年。復改廣陽曰汶山。唐置茂州。禹貢岷山在西北。俗謂之鐵豹嶺。禹之導江。發跡於此。河圖括地象曰。岷山之精。上爲井絡。帝以會昌。神以建福。故泉流深遠。爲四瀆之首。

下汶川縣。本漢綿虬。廣柔二縣地。初屬汶山郡。尋屬蜀郡。晉屬汶山郡。後周置汶川縣。及汶山郡。隋開皇初。郡廢。屬會州。唐屬茂州。皇朝熙寧九年。卽縣治置威戎軍使。有玉壘山。與導江相連。滿水所出。

下簡州。秦屬蜀郡。漢屬犍爲郡。東漢及晉皆因之。宋齊屬蜀郡。西魏置資州。及武康郡。後周移州治資中。隋置簡州。以賴簡池爲名。煬帝初。州廢。併其地入蜀郡。唐武德三年。復置簡州。天寶元年。曰陽安郡。今縣二。

上陽安縣。本漢牛鞞縣。屬犍爲郡。東漢及晉皆因之。西魏改牛鞞爲陽安。置武康郡。隋開皇初。郡廢。仁壽初。置簡州。大業初。州廢。唐復置。

中平泉縣。本漢牛鞞縣地。西魏置婆閏縣。隋開皇十八年。更名屬蜀郡。唐屬簡州。貴平鎮。本漢廣都縣地。西魏置貴平縣。及和仁郡。隋開皇初。郡廢。屬陵州。唐因之。皇朝熙寧五年。省入平泉。

下威州。蓋古冉駹國。漢武帝開之。屬文山郡。蜀劉禪時。姜維馬忠等討汶山叛羌。卽此地也。唐武德七年。

白狗羌降附。乃於姜維故城置維州。領金山、定廉二縣。正觀元年，羌叛，州縣俱罷。二年，復立維州，移治於姜維城東。麟德二年，自羈糜州爲正州。天寶元年，曰維川郡。廣德元年，沒吐蕃。初，吐蕃已陷河西隴右，更欲圖蜀川，累攻維州不下，乃以婦人嫁維州門者。二十年中，生二子，及蕃兵攻城，二子內應，城遂陷。吐蕃得之，號無憂城。章臯在蜀，收復不克。大和中，守將悉怛謀以州歸唐，李德裕受之，而爲牛僧孺所沮，復棄其地。大中三年，杜棕鎮蜀，吐蕃亂離，首領內附，乃復屬西川。皇朝景祐三年，以京遞發濰州斷獄文書，誤至維州，因改曰威州，謂唐置此州以威制羌戎故也。今縣二。

下保寧縣，本薛城。隋初，蜀師討叛羌，以其地置薛城戍。大業末，沒於羌。唐武德元年，置維州。正觀二年，自姜維故城徙州治此。及置薛城縣，後改曰保寧。有沱水，自羈糜悉州流出。東逕保寧。又東逕祺春。又東逕通化。又東逕嘉會。又東至汶州，與大江合。

下通化縣，本漢廣柔縣地。隋開皇初，置金川縣。仁壽初，改曰通化，屬汶山郡。後廢焉。唐咸亨二年，以生羌戶置小封縣，後復改曰通化，屬茂州。後屬維州。皇朝天聖元年，改曰金川。景祐四年，復舊。治平三年，卽縣。治置通化軍使，縣在保羈二州之間。

祺州。唐開元二十八年，以維州之定廉縣置奉州。及雲山郡。天寶八年，徙治天保軍。更郡名曰天保郡。廣德元年，沒吐蕃。乾元元年，嗣歸誠王董嘉俊以州來歸。更州名保州。以嘉俊爲刺史。又更曰古州。其後復曰保州。領縣四。曰定廉。本隋定廉鎮。後沒於羌。武德七年，招白狗羌置。曰歸順。曰雲山。皆天寶八年析定。

廉置曰安居。沒蕃後，縣皆廢。唯首領董氏世襲刺史。羈縻於威州。皇朝政和四年，刺史董氏入朝，以其地置祺州。今縣一。

春祺縣。本定廉縣地。皇朝政和四年置。

亨州。漢爲廣柔縣地。屬蜀郡。晉屬汶山郡。唐天寶元年，招附生羌，置霸州及靜戎郡，領縣四。曰安信，曰牙利，曰保寧，曰歸化。廣德元年，沒吐蕃，後縣皆廢。首領董氏歸附，世襲刺史。羈縻於威州。皇朝政和四年，刺史董氏入朝，以其地置亨州。今縣一。

嘉會縣。本信安縣地。皇朝政和四年置。舊保霸二州在威州之裏，名爲羈縻。而據吾腹脅，不與它等。雖受爵命，而猶以蕃夷自待。恭順之心，未能純壹。往往多幸生羌擾攘，藉已與之和好，因挾以自重，而邀厚賞。近緣二酋挈籍自獻，於是有詔令建築郡邑，置吏以治之。無亡矢遺鏃之費，而士爲王士，民爲王民。自茂如威，不涉異域，有久逸永寧之道焉。

同下州永康軍。自秦至隋，屬蜀郡。唐屬彭蜀二州。皇朝乾德四年，置永康軍。治導江之灌口鎮。熙寧五年，軍廢。元祐初，復置今縣二。

望導江縣。本漢郫、綿、虢二縣地。屬蜀郡。蜀置都安縣，屬汶山郡。後周改都安曰汶山。隋改廣陽曰汶山。在茂州郭下。而此縣廢。舊治灌口。唐武德元年，以其地置盤龍縣。尋更名曰導江。移於今治。屬益州。三年，屬濛州。正觀元年，州廢，屬益州。後改曰灌寧。垂拱二年，屬彭州。開元中，復爲導江。皇朝乾德四年，來屬。

而以灌口爲軍治。熙寧五年軍廢。復屬彭州。元祐初來屬。有玉壘山。與汝州相連。左思蜀都賦所謂包玉壘而爲宇是也。有蠶崖關。以扼西山之走集。秦時蜀守李冰作大堰於江。以溉諸縣。作三石人於白沙郵。立水中。刻字爲約口。水竭不至。足盛不沒腰。是以蜀人不知飢饉。沃野千里。世號陸海。有廣濟王廟。所以祠水也。

望青城縣。本漢江源縣地。後置齊基郡。後周郡廢。改曰清城縣。隋屬蜀郡。唐垂拱二年屬蜀州。開元十八年去水。作青城。皇朝乾德四年來屬。熙寧五年軍廢。復屬蜀州。元祐初來屬。有青城山。

同下州仙井監。秦屬蜀郡。二漢屬犍爲郡。晉及宋齊皆因之。梁置懷仁郡。後周置陵州。取陵井爲名。隋置隆山郡。唐武德元年復爲陵州。天寶元年曰仁壽郡。皇朝熙寧五年廢爲陵井監。政和三年改爲仙井。今縣二。

望仁壽縣。漢武陽縣地。晉置西城戍。以爲鹽井之防。梁置懷仁郡。西魏改西城戍。置普寧縣。隋開皇初郡廢。十八年改普寧爲仁壽縣。大業初置隆山郡。唐爲陵州。有陵井。東漢張道陵所開。有毒龍藏井中。及鹽神玉女十二爲祟。天師以道力馱出毒龍。禁玉女於井下。然後人獲鹹泉之利。皇朝不欲斥天師名。故改陵井爲仙井。有天師廟。今爲至道觀。有玉女祠。今號靈真夫人。

中下井研縣。漢武陽縣地。東漢置西陽郡。西魏置蒲亭縣。隋改爲井研。屬隆山郡。唐屬陵州。始建鎮。隋開皇十一年置縣。隸陰山郡。唐屬陵州。皇朝咸平四年省入井研。

成都府路化外州

下都督府松州。本諸羌之地。後周置扶州及龍涸郡。隋隸同昌、汶山二郡。唐武德元年。置松州。以地產甘松爲名。天寶元年。曰交川郡。東至扶州。南至翼州。西北接吐蕃。領縣四。

下嘉誠縣。後魏時。白水羌豪舒治據此地。其子舒彭遣使朝貢。乃封爲甘松縣子。始置甘松縣。魏亂。又絕。後周復招慰之。天和六年。置扶州。領龍涸郡。隋開皇三年。郡廢。而州徙治于同昌。改甘松縣爲嘉城。屬同昌郡。唐置松州。有甘松嶺。江水之所發源也。

下交川縣。隋開皇初置。屬汶山郡。唐武德元年。來屬。

下平唐縣。唐垂拱元年。析交川及當州之通軌。翼針置。屬當州。天寶元年。來屬。

下鹽泉縣。

下當州。本諸羌之地。後周置覃州。及覃川、榮鄉二郡。隋開皇初。郡廢。四年。州廢。屬汶山郡。唐正觀二十一年。析松州置當州。以地產當歸爲名。天寶元年。曰江源郡。東至翼州。南至翼水縣。東北至松州。西北接生羌。領縣三。

中下通軌縣。後周置。隋屬汶山郡。唐屬松州。正觀中。羌酋董和那蓬固守松州有功。於是析松州之通軌置當州。以和那蓬爲刺史。後其子屈寧襲焉。

下利和縣。顯慶二年。析通軌置。

下谷和縣。文明元年。開生羌置。

下悉州。本生羌之地。後周置廣年。左封二郡。隋開皇初。並廢。屬汝山郡。唐顯慶元年。析當州置悉州。以悉唐川爲名。天寶元年。曰歸誠郡。東南至翼州。西北至當州。領縣二。

中左封縣。本廣年。後周置。隋仁壽初。改曰左封。屬汝山郡。唐武德元年。屬翼州。正觀二十一年。屬當州。顯慶元年。生羌首領董係北射內付。乃以左封置悉州。并置悉唐。識曰二縣。治悉唐。以係北射爲刺史。咸亨二年。徙治左封。而以悉唐置靜州。

下歸誠縣。垂拱二年。析左封置。

下靜州。本諸羌之地。唐置悉州。後州徙焉。儀鳳二年。置南和州。天授二年。改爲靜州。天寶元年。曰靜川郡。東至悉州。南至威州。西至平戎城。北至當州。領縣三。

中悉唐縣。唐顯慶元年。置爲悉州。治焉。咸亨元年。悉州徙治左封。而以悉唐置翼州都督府。儀鳳元年。翼州還治翼針。乃於悉唐置南和州。後改曰靜州。

中靜居縣。有靜川。州縣所以取名也。

下清道縣。

下恭州。本諸羌之地。唐爲廣平縣。屬靜州。開元三十四年。分置恭州。天寶元年。曰恭化郡。東至柘州。南至威州。北至吐蕃白崖鎮。領縣三。

下和集縣。本廣平縣。屬靜州。開元二十四年。置恭州。天寶元年。改曰和集。

下博恭縣。開元二十四年。析廣平置。

下烈山縣。開元二十四年。析廣平置。

下柘州。本諸羌之地。唐顯慶三年。開置。天寶元年。曰蓬山郡。東至靜州。南至威州。北至恭州。松嶺鎮。領縣

二。

下柘縣。

下喬珠縣。

下翼州。本漢蠶陵縣地。屬文山郡。郡廢。屬蜀郡。晉復屬汝山郡。後周置翼針縣及翼針郡。隋開皇初。郡廢。

屬會州。後屬汝山郡。唐武德元年。析置翼州。天寶元年。曰臨翼郡。東至石泉縣。南至茂州。西至悉州。北至

松州。領縣三。

下衛山縣。本翼針。天寶元年。更名。

下翼水縣。後周置。曰龍求。及置清江郡。隋開皇初。郡廢。改縣曰清江。十八年。又改曰翼水。漢蠶陵縣故城

在今縣西。

下峨和縣。

下真州。本隋翼水縣地。唐屬翼州。天寶五載。析置昭德郡。乾元元年。改曰真州。領縣四。

中下眞符縣。天寶五載。析雞川。昭德。二縣置。以爲州治。

中下雞川縣。先天元年。析翼水縣。開生獠置。屬悉州。天寶元年。屬翼州。五載。來屬。

下昭德縣。本識曰縣。顯慶元年。開生獠置。屬悉州。天寶元年。屬翼州。改曰昭德。五載。來屬。

中下昭遠縣。

下乾州。本諸羌之地。唐大曆三年。開西山置。領縣二。

下招武縣。

下寧遠縣。

下姚州。本南夷。故滇池國。漢武帝開之。置益州郡。東漢分益州置永昌郡。蜀劉氏分永昌置建寧郡。又分

永昌。建寧。置雲南郡。晉及宋。齊。皆因之。兼置寧州。西魏。周。隋。不能遠有。唐武德四年。安撫大使李英。奏置

姚州於漢之雲南故地。以此川內人多姚姓。因以爲名。麟德元年。徙州治於弄棟川雲南郡。後南詔蠻閣

羅鳳舉。攻殺雲南太守張虔陀。自是姚州沒於南詔。自巂州南至西瀘。經陽蓬。鹿谷。菁口。會川。四百五十

里。至瀘州。乃南渡瀘水。經哀州。徽州。三百五十里。至姚州。州西距南詔羊苴咩城三百里。領縣三。

下姚城縣。故漢弄棟縣地。

下瀘南縣。本長城。垂拱元年置。天寶初。更名。

下長明縣。

中都督府。嶲州。本南夷。故邛都國。漢武帝開之。置越嶲郡。東漢、晉、宋皆因之。後周置嚴州。隋開皇六年。改曰西寧州。十八年。又改曰嶲州。大業初。復置越嶲郡。唐武德元年。改曰嶲州。至德二載。沒吐蕃。正元十三年。節度使韋臯以兵收復之。本治越嶲縣。大和五年。爲蠻寇所破。六年。李德裕徙州治臺登縣。南至姚州。北至黎州。領縣九。

中臺登縣。漢屬越嶲郡。有孫水。司馬相如檄文所謂梁孫源是也。晉因之。一名白沙江。後周置白沙郡。隋開皇初。郡廢。屬越嶲郡。唐爲郡治。

中越嶲縣。本漢邛都縣地。爲越嶲郡治焉。後置越嶲縣。

中邛都縣。本漢蘭縣。屬越嶲郡。後周置邛都縣。及邛都郡。隋開皇初。郡廢。來屬。

中蘇祈縣。本漢蘇示縣。屬越嶲郡。後周平南夷於故城。復置。及置亮善郡。隋開皇初。郡廢。來屬。

中西瀘縣。本邛都縣地。梁置可泉縣。及宣化郡。隋開皇初。郡廢。來屬。唐天寶元年。改可泉曰西瀘。

中昆明縣。本漢定祚縣。屬越嶲郡。後周置定祚鎮。唐武德二年。改爲昆明縣。昆明在嶲之西南。今羈縻南

寧州諸蠻所居是也。

中和集縣。唐正觀八年置。

中昌明縣。唐正觀二十二年。開松外蠻。置牢州。及松外、尋聲、林開三縣。永徽三年。州廢。省三縣入昌明。

中會川縣。本邛都縣。唐上元二年。徙治會川。因更名。有瀘津關。瀘水出。曲羅。東下三百里。始曰瀘水。兩峯

有殺氣。暑月舊不行。故諸葛亮表言五月渡瀘。深入不毛也。其水下合繩水、若水、孫水、淹水、逕馬湖。摠曰馬湖。江東北至敘州。與岷江合。